

ASO LULU, 17 IUNI 2020

Na toe amatalia Taualumaga a le Fono Aoaofaitulafono i le itula e 6:13 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.3) 2019/2020 & Tulafono Tau Faaofi o le Faatatauina o Tupe 2020/2021.

SUI FOFOGA FETALAI: Ou te faasilasila atu ua toe amatalia nei Taualumaga a le Fono Aoaofaitulafono.

E i ai le talitonuga o lea ua maua foi se faasiliga malosi, ua tatou i ai i malologa o lenei vaega o le aso, o lea ua tatou i ai i le Maota e faaauau a tatou galuega.

E faataatiaese Taualumaga i le aoauli analeila, o lo o saunoa le sui usufono mo Salega Sisifo. Ma ou te tapa ma le faaaloalo le Afioga i le sui usufono mamalu e te tulai mai e faaauau lau saunoaga.

Susuga Hon Laauli Polataivao Leuatea: Lau Afioga i le Fofoga Fetalai malie lava e i ai lava si mataupu laitiiti lea e ala i a tatou faamaumauga e fia maua se avanoa, na o sina mea lava e fia faamalamalama mo le gasologa o tatou galuega lau Afioga. O lea ua taunuu mai le Hansard o le tatou Fono analeila, e matauina pea ma le faanoanoa ona o le lauga a lenei sui usufono ua le uma mai, o lea e maua na tape lau mic. Na uma atu foi le Fono ananei i le afiafi ae saunoa mai le tapuaiga a si ou itumalo, Laauli, o le a le mea e mafua ai ona alu alu au tala pe? Ona ou faafesootaia lea o alo ma fanau lea e saofafai i le tulaga o le tatou IT, ae malie lou finagalo lau Afioga, o le tatalo lava ia a le pumate, faamolemole aua le taofiofia nai a matou saunoaga, aemaise o lea e alu i fafo i le atunuu o lea e faafofoga mai. A ua maua o lea foi ua faamaonia i i, ia e motumotu uma ata upu na fai. O le tatalo lea ma le agaga faaaloalo.

O le isi mea lau Afioga, na faaoo mai le talosaga a nai au Tusitala ia e i fafo, o lea e faataga na o le TV1 ae taofi uma le toatele o le au media i fafo. O lau Afioga e i ai le pule atoatoa, a o le tatalo ma le agaga faaaloalo ia amanaia uma le au Tusitala a Samoa. Ma lou agaga faaaloalo. Ia manuia le Fono.

SUI FOFOGA FETALAI: Faafetai mo le saunoaga a le sui usufono mamalu. E faateia foi le Nofoa i le tulaga lea, ae na ona ou asuasua atu vaimalu i puega i le finagalo o le sui usufono mamalu. Afai o le tulaga lea, o le tulaga masani a le Maota lenei, a i ai ni faaletonu o tatou masini pueleo, e mafai ona toe silasila i ai e 4 aso e toe faasao ai. A tusa ma le tofa i lau Afioga i le sui usufono mamalu mo Gagaifomauga Nu.3, ia taoto maia lou finagalo se i toe silasila i ai le Ofisa o le Failautusi o le Fono i tulaga faapea. O le tulaga i le...

Tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ona o lea e aafia uma tatou, o lona uiga e faapena foi la i a matou lauga, aua o nei mea o mea pueleo ia e tatou te galulue ai, e aafia uma ai lava le Maota. Ua ala ona ou tulai atu ne i te i ua pea mai, ai e i ai se faiga faapitoa ua le maua ai le saunoaga a le sui usufono mo Gagaifomauga Nu.3. O lona uiga o tatou uma lava ona o le tulaga lena e tasi lava le mea e ola ma pepe uma ai mea uma. Afai lava na faaletonu se masini a se toatasi, lona uiga e afaina uma lava tatou.

Susuga Hon Laauli Polataivao Leuatea: Lau Afioga ma le faaaloalo e pei o le ala lena leaga o lea ua taunuu mai ia te au le Hansard, e na o au lava ma lau mic lea e faaletonu. O lea e maua uma lava tuleiga ma saunoaga analeila i le felafolafoaiga ma le Afioga i le Palemia, ae na o au lea e le o maua. Ia, ma lou agaga faaaloalo.

SUI FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o lea foi ou te le o vaai au i mea ia. Pau lava le mea ou te popole ai, o le faafogafoga mai a le atunuu pe ua fai i se tagata e toatasi, a o lea ua silasila mai, o le system a lea e tasi tatou te o ai.

Susuga Hon Laauli Polataivao Leuatea: O le a le faafinua ae lafo atu ia, o lea ua e saunoa lafo atu. E lafo atu ma lou agaga faaaloalo, ma le faamoemoe e le toe tupu. Faafetai.

SUI FOFOGA FETALAI: Ou te manatu o le... Faafetai i le amanaia o le Nofoa. O le tulaga e pei ona logoina le Nofoa e faapea taga o le tatou masini pueleo, afai e 4 ni mics o lo o ola faatasi, ia e ono tulai se faafitauli

faapea, a o lea ua saunoa le Failautusi, o le a toe silasila i tulaga uma mo le faaleleia o le vaega lea.

O le tulaga i le tatou media, e le toe suia e le laulau se faaiuga ua maea ona faatino. O le mea lea, o le a faaauau le tatou galuega i lenei afiafi. Ou te tapa le sui usufono mo Salega Sisifo e saunoa.

Afioga TOOMATA AKI TUIPEA: Faafetai i lau Afioga mo le avanoa. E faafetai foi i le alofa ma le agalelei o le Atua ua taitai mai lo outou soifua ma lo tatou ola ua mafai ai ona tatou taunuu saogalemu mai e faaauau lo tatou valaauina i le Fonousu a Samoa i lenei itula afiafi.

Ma e faia le malologa o taumafai atu se tuualalo a lou nei sui usufono i Matagaluega a le Malo ma Faalapotopotoga, o ni tuualalo faatupu manatu.

O le Matagaluega o Faatoaga, lau Afioga i le Minisita ma le mamalu o le Pulega, faafetai mo le faatinoina o galuega a le tatou Matagaluega, ua matauina le tele lava o atinae ma fuafuaga a le Matagaluega mo le uunaiga o o tatou tagata ina ia galueaiina le laueleele aemaise foi lafumanu papalagi ma so o se atinae. O lea la ua oo mai le tulaga faaletonu i le tamaoaiga ona o le faamai Koviti-19, o lea la ua iloga le tali mai. E moi e le i iloga, ae ua matauina, e le pei tatou o isi atunuu ua tatou vaaia i le TV ua o ua laina ma ipu, e fia miliona tagata, e tiga ona tele le tamaoaiga o atunuu tetele e pei o Amerika, ae ua tatou vaaia le tele o tagata fia aai, ae le o faapea Samoa, o lea e tua i le laueleele. O lea e momoli atu ai le faafetai ona o fuafuaga tuutumamao aua lava le uunaiga o le tamaoaiga i le tulaga tau faatoaga, ina ia aua ne i faalagolago tele i meataumafa mai atunuu i fafo a ia faalagolago lava i lo tatou laueleele o lo o mafai ona galueaiina, o lo o maua ai lava le tamaoaiga tatou te tua i ai i aso uma.

Ae ou te manatua i le faatoa amataina o le Paeaiga lenei, sa saunoa le Afioga i le Minisita sa i ai muamua, o le a aumai ni a tatou palau e matua mechanize ai le faatinoina o faatoaga. Ou te talitonu o le taimi lenei ua aoga ai le ituaiga masini ia e fesoasoani i le uunaiga o le atinaeina o faatoaga. A o le fesili, ua taunuu mai ni a tatou palau? aua ua leva ona agiagia i totonu o le Palemene lea fesoasoani e ono aumai e le Malo o Saina. Afai ua i ai pe leai foi, ua tataua ona faagaoioi, aua o le auala lea o le a vave ai ona uunaia le atinaeina o tatou faatoaga, e le gata i le aufaifaatoaga i nuu i tua, ae faapena foi i totonu o le taulaga. Ma e matua talitonu lou sui usufono...

SUI FOFOGA FETALAI: Se i tulai mai le Minisita mo Faatoaga ma Faigafaiva.

Tofa Hon Lopao Natanielu Mua: Lau Afioga i le Fofoga Fetalai, leai, sa ou faapea ai e puupuu mai le folasaga a le sui usufono mamalu i le mataupu lea, ae faamalie atu, ou te sau e le o i ai se tulaga faapena a le Matagaluega mo ni palau e aumai, ae ui i lea, ou te le o manatua foi, a faapea

foi o i ai, ia e le i toe oo i ai se fuafuaga a le Matagaluega i le taimi nei. Ae o lo o tilotilo pea i ai lau Afioga, mo le faasaoina o le taimi. Ma le faaaloalo.

SUI FOFOGA FETALAI: Faafetai. Faaauau le saunoaga a le sui usufono mamalu.

Afioga TOOMATA AKI TUIPEA: Faafetai. Ia afai ua le faataunuuina lea fuafuaga, leaga sa agia i totonu o le Maota lea, ia taatia atu ia i ou tafatafa, atonu lava e alu alu ona taunuu lea i se taimi. Ae ua ala ona ou laga ona o le naunautaiga e uunai mea tau faatoaga i le taimi lenei.

Susuga Hon Laauli Polataivao Leuatea: Lau Afioga i le Fofoga Fetalai, na o sina mea lava e fia faamalamalama i le saunoaga a le sui usufono.

SUI FOFOGA FETALAI: E fia faamalamalama o le sao lea?

Susuga Hon Laauli Polataivao Leuatea: Ia, e faamalamalama lau Afioga i le Fofoga Fetalai.

SUI FOFOGA FETALAI: Saunoa le sui usufono mamalu.

Susuga Hon Laauli Polataivao Leuatea: I le saunoaga lea leaga o au sa ou tautalagia le mea lea o palau i totonu o le Maota. Ia o la e na i ai le fuafuaga o le meaalofo mai Saina. O lea na i ai le polokalame lona lua lea e sau i le taimi lenei a Saina na tuu e aumai uma ai tatou masini. Ma e le natia, e ova atu ma le \$10 miliona Amerika le fesoasoani lena na aumai. Ia paga leaga ua ou see ese, ua ese le Minisita ua ese foi tonu ua toe fai. A o le agaga maualuga, o la e sa i ai le polokalame a Saina, mechanization ma le commercialization, la e faatino nei i uta i le taimi lenei.

SUI FOFOGA FETALAI: Malie le sui usufono o saunoa se i tuu atu lava le avanoa leaga o lea ua e taua le fesuaiga lea o Minisita. E tatau ona tuu le avanoa i le Minisita mo Faatoaga ma Faigafaiva. Saunoa.

Tofa Hon Lopao Natanielu Mua: Lau Afioga i le Fofoga Fetalai, ou te faaali atu lava ma le... ou te sau e leai se meaalofo \$10 miliona Amerika mai Saina o i ai e pei ona folafola mai foi e le Malo o Saina. O lo o i ai le polokalame lea e faagasolo nei e tau o le SKA TAP lea ua uma le phase 4 e \$4 miliona tala Amerika. O le phase 5 lea ua uma foi ona sainia lea e amata po o le faaiuga o le masina nei po o Oketopa po o Novema, e \$5 miliona Amerika. O tuutuuga uma ma aiaiga ia e faatino i lalo e le gata o le Matagaluega o Faatoaga ma Faigafaiva, a o le Ofisa o le Va i Fafu. O le mea lena ne i te i ua i ai se tulaga faapea, ia e leai, ne i te i ua faapea ai ua nofo

le Minisita ma tiai i se lapisi le \$10 miliona tala Amerika. Na o le pau lena o le mea e faamalamalama atu. Ma le faaaloalo.

SUI FOFOGA FETALAI: Masalo o lea ua manino auofala i le saunoaga a le Minisita o lo o tulai nei i le Nofoa.

Susuga Hon Laauli Polataivao Leuatea: O sina mea laitiiti lava lea lau Afioga e leai sou agaga faapea ua ou fai atu e le i faataunuuina e le Minisita. O la e na faataunuu le poloketi. A la e i uta i Nuu le poloketi lona lua lena. A o le version 4 lena o le poloketi lea na amata mai le taimi o Le Mamea, vegetable garden mechanization ma le commercialization. O le polokalame lena. A e vaai la i ai, a faapea e le faamaonia lau tala, o le faaauauina lena o le poloketi la e fai mai i le taimi lenei. O lea e fai uma ai lava tunnel houses lea e i ai i le atunuu atoa. O le poloketi lena lau Afioga ma lou agaga faaaloalo.

SUI FOFOGA FETALAI: Se i tulai mai le Afioga i le Minisita.

Tofa Hon Lopaoo Natanielu Mua: Lau Afioga e leai, leaga ou te le manao, e le o toe afio nei lau Afioga i le sui usufono mamalu. O lea foi ou te tautala atu leaga o au lea e nafa ma le Matagaluega. Leai, o le poloketi a lenei o lea ua 4 phases na ou alu atu ua uma ona amata. A o ni mea a ia o ni excavator e aumai e mechanize ai le faiga o tatou faatoaga, e leai se mea. E i ai le pop cap la e i ai mo nai a tatou vegetables garden laiti. A o le mea lea e saunoa i ai lau Afioga, lea e te talanoa mai i excavator lapopoa foi nei e aumai e sua ai le laueleele. O le mea la lena e le o i ai. Lau Afioga i le Fofoga Fetalai ma le mamalu o le Maota, ne i te i ua faaluafesasi ai fua le faafofoga a le tatou atunuu ma le Maota. Ma le faaaloalo lava.

SUI FOFOGA FETALAI: Malie le sui usufono o lea ua manino lelei le faamaninoga a le Minisita o lo o nofo nei i le Nofoa.

Susuga Hon Laauli Polataivao Leuatea: O le a le fai le faafinauga. E faamalulu atu foi i lau Afioga i le Fofoga Fetalai. Ia o le a taatia ai faapea, ae ou te talitonu leaga o la e faafofoga mai le Ofisa Sili o Pulega, o la e foi e faafofoga mai le Matagaluega sa soalaupule, ae ui o lea, o le a taatia ai ia faapea.

SUI FOFOGA FETALAI: Ua lelei faafetai. Ou te tapa le sui usufono mo Salega Sisifo e faaauau. O lena ua malamalama ma manino lelei le tulaga o masini tetele ia e te saunoa i ai. E lelei ona mei ese ma faasolo ai loa le lauga e le o toe umi foi sou taimi.

Afioga TOOMATA AKI TUIPEA: Faafetai. E ala ona laga lau Afioga, leaga o le taimi tonu lenei e manaomia ai, leaga o lea ua tataua ona tatou faatino, saosaoa le atinaeina o faatoaga, ae ona o tulaga ia e tataua ona fai. Ma e le paole foi, e le faapea o lea e mau i au faamaumauga saunoaga i totonu o le Maota lenei. Afai la ua le faataunuuina, ou te le blame ina le afioga i le Minisita, ae na ona faamanatu, leaga na agia i totonu o le Maota lenei. Ae o le a ou see ese.

Lau Afioga, o le atinae o le fai Isaraelu, manaia ia o le fuafuaga. Faafetai mo le aumaia foi o lea ituaiga fai, ae e i ai faafitauli ua ou matauina, o le vave ia ona aafia i le lausului ma le tele o faamai eseese ua aafia ai. O le popolega ia te au, e i ai le tatou fai lava ua tatou masani ai e sili atu ona lelei le aano toe anagata, e moni lava e aafia i faamai, ae le pei o le fai lea Isaraelu ua ou matauina, o le vave ia ona afaina, ma e fautuaina ai, ne i te i ua faatea ese ma faale-amanaia le fai lea muamua e tataua ona toe atinae le fai muamua lea le fai papalagi, ne i te i ua pei tatou o le tulaga lea ua ina ua sau le koko Solomona, ona tatipi lea i lalo o tatou koko Samoa, lea la ua tatou iloa le faafitauli i le koko Solomona, a o lea ua amata ona toe tau saili le koko Samoa moni.

E pei o le agaga lena ua ala ai ona ou toe laga le itu lea, leaga na ou laga lava muamua ina ua taunuu mai le fai lea Isaraelu, e tele ona faafitauli, ae faafetai i le aufaifaatoaga o lo o taumafai pea, taumafai pea e tiga ona taugata vailaau o lo o taumafai e faaleleia ai lea tamaoaiga, a o lo o taumafai lava i lo latou fia naunau e atinae foi lea tamaoaiga, o le atinae o le fai fou lea Isaraelu. Ae na ona tuu atu i ou tafatafa, aua ne i faagaloina le tatou fai lea muamua, le fai papalagi ua leva ona tatou masani mai ai. Afai e leai ni poloka o fai i le taimi lenei o ni tamai fai e toe tufa i le atunuu, ou te fautuaina ia toe lalaga le fai papalagi lea muamua, ua tatou masani ai, ma e laitiiti ona faafitauli, e le pei o le fai Isaraelu lea ua i ai nei i totonu o le atunuu.

O lona 3, e matauina i faasalalauga i le TV, e i ai le faamai ua aafia ai puaa, meaituaolo, lea ua sau le faasalalauga ma warn mai le atunuu i le aano o le meaituaolo. Ou te talitonu e tataua ona fai i ai se fuafuaga. E tele foi isi faafitauli. Ua avea lenei meaituaolo ma manu faalafua i totonu o le atunuu. E le gata e moni e aoga mo faalavelave, ae a tilotilo i le economics o le fafagaina o le puaa, ia e fafaga fafaga fafaga le puaa vaai atu na o le lapoa, tele ai tupe e alu ai, a o le tele ia o le faaletonu ua faaleaga ai aai, ua le galulue ai foi tagata i tua i tuamaota ma tualaoa, ua fefefe i puaa. Ua taugata foi, afai e atiae, ona o lea ua toe faatau foi uaea, e taugata. Ae se i silasila afai ua faamaonia se faamai e maua ai nei meaituaolo, ae a le mea e le faalalo uma ai loa meaituaolo i le atunuu? Ma lou faaaloalo lava.

SUI FOFOGA FETALAI: Malie le sui usufono o saunoa se i tuu atu le avanoa i le Afioga i le Minisita i le mea lea.

Tofa Hon Lopaoo Natanielu Mua: Faafetai lava i le Afioga i le sui usufono mamalu mo le faamanatu mai o le faamai lea e tau o le African Swine Flu ua maua ai Papua Niu Kini ma le tele o isi atunuu o le atu Asia ma Europa. Ia ae amata mai Aferika. Ina ne i te i ua faapopoleina le tatou atunuu, o le taimi nei e taunuu mai i le Aso Faraile nei talaatu taeao le masini lea e aumai nei e test ai a tatou meaituaolo sa fesoasoani mai ai le UNO ma le UNDP, e faapea foi le Matagaluega o Tupe. Ae o le sailiiliga sa faia i le masina o Fepuari, e le i oo mai le faamai ia tatou ma ua faapea ona i ai foi auala ma puipuiga o lea ua faataatia e le Matagaluega faatasi ma le tatou Vaega o le Border mo le aumaiga o meataumafa e gaosia mai le meaituaolo. Ae mo le taimi nei, e le o tele se ono afaina o tatou, ona o le tele o meataumafa ia, e aumai sa taoina, tulou, o isi ua uma ona faavela ona tuuapa ai lea, se i vagana mea foi ia o pork charger o lo o i ai le galuega o lo o faia e le Matagaluega. Na pau lena o le mea e ono oo mai ai le faamai lea ona o la e o lo o faasa ona aumaia i so o se atunuu o lo o ua aafia, se i vagana atunuu lea e le i aafia e pei o Niu Sila ma Ausetalia, ona mafai lea ona aumai ai le tulaga. A o isi vaega ma puipuiga e pei ona i ai, o la e ua uma ona amata e le Matagaluega faapea foi ona logo atu ma le tatou Faalapotopotoga o Taumafa a le Lalolagi.

Ina ne i te i ua faaumiumi le mataupu, a o lena ua i ai le gaioiga a le Matagaluega i le tulaga lea. Ma le faaaloalo.

SUI FOFOGA FETALAI: Faafetai. O lea ua saunoa le Minisita, e manatu foi ua faamalieina le sui usufono mamalu e pei ona atugalua ai, ae faafetai mo le finagalo faaalua, ae faaauau lau lauga.

Afioga TOOMATA AKI TUIPEA: Ia e i ai lava le upu foi lele ne i oto lou pulou ua susu lou ulu. E lelei lava le puipua i lo le togafitia ne i... tatou i le tupu mai, te i ua tuuaia tatou pei o Saina ua mafua ai se faamai e mafua mai i meaituaolo. Ma lou faaaloalo lava.

E momoli le faafetai i lau Afioga ma le Matagaluega ona o le auaunaga i le faaleleia o le atinae ia o manupapalagi. Faafetai tele lava. O le aoga ia o le i ai o a tatou manupapalagi ma fua o faatoaga. E le gata e gafatia ai le fofoga taumafa o tatou lava tagata, ae a tele tulaga faapea, o le a taofiofi foi le sau mai fafo o meataumafa tatou te faaaogaina ona laitiiti ai foi lea o tupe e alu i fafo mo le faatauina mai o ia meataumafa. E fautua atu ai, ia ma saga atinae pea le tamaoiga o le tatou lafumanu e le i taitai ona lava, o lo o manaomia lava nai manupapalagi mo le tatou motu i Salafai.

O le isi vaega faamolemole, o le tulaga lea i le taumafaiga e totona le laau lea ua leva ona i totonu o Samoa ae le i, e i ai le laau lea ua galo ia te au, ua leva lava ona i totonu o Samoa, e tele le tupe e maua mai ai. O le vanilla, o lea lava ua leva ua fia tausaga talu ona i totonu o Samoa, a ua uma foi ona agia, e ese le tele o le tupe e maua ai, a o le faalavelave, e le iloa po o lelei

ona faafoe le atinaeina o lea ituaga laau, se i silasila ane, ua tatau ona matua faatupulaia ma tele ni aufaifaatoaga latou te atinae lea tamaoiga lelei. Ou te manatua sa saunoa le Afioga i le Palemia, a faatusatusa le uta o le popo ma le uta o le vanilla, pe tasi le paelo, e tasi le paelo ae tutusa lona tupe e maua mai ai ma le uta atoa o le popo. O le mea la lea ou te talitonu...

SUI FOFOGA FETALAI: Malie le sui usufono o lo o saunoa se i tuu atu le avanoa i le Minisita mo Tagata Tafafao Maimoa Mai Fafao.

Afioga Hon Sala Fata Pinati (Minisita mo Tagata Tafafao Maimoa Mai Fafao): Faafetai mo le avanoa, faafetai foi i le uso a sui usufono e tusa ai foi ma le saunoaga matagofie i lenei itula afiafi. O le tulaga lea i le vanilla, ia mo lo outou silafia ua uma ona sainsi le feagaiga ma le kamupani lena a Iapani, o Hokkaido o le faamoemoe o latou lea o le a latou taumafaia le poloketi lea o le vanilla atoa ai ma le oketi, le orchid. O le tulaga la o le faatoaga lea o le a faamoemoe e faia i Mulifanua, o lea lava ua faaavanoa pe a ma le 1000 eka pe a mafai e faatino ai le atinae lea, ma o le mea moni lava lea ua i ai, o le a aumai foi e ua faapitoa mai ia Iapani, e i ai le latou lab e faatu i Mulifanua, o le a fai ai lava le gaosiga o le oketi lea, atoa ai ma le vanilla. O le mea uma la ia, a oo i le taimi e selesele ai, o latou foi e sailia le maketi i fafo e ave i ai. Na pau lava le mea a tatou e faatali i ai, o le vaegatupe tele lea o le a maua mai pei ona saunoa le sui usufono, e faitau miliona tupe e maua mai pe a faamanuiaina le atinae lea a Samoa. Masalo tasi lea vaegatupe tele o le a tauva pe o le a tausinio ma le vaega lea o tagata tafafao maimoa mai fafo e tusa ai ma le faamoemoe. Masalo ua maea ai i se tulaga pei ona fesiligia ai lea mataupu e le Afioga i le sui usufono.

SUI FOFOGA FETALAI: Se i tulai mai le Palemia. Malie sui usufono mamalu, se i tape ane lava a outou mics ma le le maua o tatou faamaumauga.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e fai lava si maaleale o le laau lenei ma le totoina ma le taumafai e tapue ina ia ola lelei. E le moomia le soona sosolo i luga, ae moomia foi ona faasosolo i se laau e mafai ona oo i ai e faafeusuai. E fai lava si faigata. O le ala foi la lena o lea se i amatamea ai le Esetete Tausi. O le ala foi lea o lea e manaomia ai se kamupani i fafo e malamalama. O le vanilla, na o Amerika i Saute sa ola ai, lea e aumai faaoga e fai ai taumafa, ona o atu loa lea o papalagi aumai le laau faaola i o latou atunuu. O le mea la ua tupu, o le matua ola ae le fua, ona toe o loa lea o saienitisi toe mataitu, ona iloa ai loa lea, sina tamai manu lava pei le segasegamou, o lana galuega lena e fai, e alu foi lele e mimiti mai le suamalie a o le mimitiga la lena e alu atu le manu eu mai le mea lea e tautau mai luga e tuu ifo i lalo, ona to ai loa la lea o le fugalaau. A

le faia la le mea lena, e le fua. O le faalavelave, e le mafai ona aumai le manu lea i fafo mai Aferika, ona nonofo loa lea o saienitisi ma study le faiga e le manu lea o le mea lea, o le ala lena o lea e faigata ai. A oo loa la ina toto ae ola ona e usu loa lea i le taeao i le taimi e fua mai ai, ma le mea o le laau afitusi, o oe la lea o le a e faafeusuaiga sex organs ia e maua uma i le laau e tasi pei o le faisua, ona e tago loa lea eu mai le isi mea lena i luga faapipii mai i lalo ona mafai loa lea ona pauu mai loa fua nei e matua fetiitii po o mea pei ni pi. A e vaai la i ai, e faapea le uumi o fua o le laau, ae pei lava ni pi. E tatau la ona e ala i le taeao pe a oo loa ina fua mai le taimi e oso ae ai le la, ona fai loa lea o lau galuega lea. E faigata tele la ona e iloa ona fai le mea lea, seiloga e train faapitoa ai oe. O le ala lena o lea e ala ai ona faifaimalie le mea, leaga e le faigofie. Ae pe tasi a la si au mea e toto e alu atu i i e tau i o i le faitotoa, e alu lava le taeao o lea e te faatu ai lava i le faafeusuaiga. E le faigofie la lau Afioga. A o le tulaga lena, o le tala na ou faia, na tau mai ia te au e le tagata lea na te faia i Fiti le mea lea, e tasi lau afa paelo e maua mai ai lau seleni, ae tutusa ma le 9 ia tane o 99 ton trucks. E matua tumu i taga popo, e tutusa lelei lava le uta popo atoa, ae tutusa lelei lava le tupe e maua mai ma si tamai uta mea ia e pei oni pi. A e vaai i ai, e pei lava o ni pi ai. Lau Afioga i le Fofoga Fetalai, o lea o le a e faafofoga mai a le faamatalaga a le Minisita o le Esetete tausii, la ua latou amataina le mea lea. E masalo po o se isi 10 tausaga ona faatoa mafai loa lea ona tele se seleni e maua mai i i, ma aveva loa ma se isi foi auala, e maua ai tupe a o tatou faifaatoaga. E manaomia tagata e malamalama i le faiga o le mea lea. O le ala foi lea o lea e manaomia ai tagata ia, e i ai le maketi e mafai ona latou faia le mea lea, ma i ai foi le latou maketi e mafai ona maketi ai. E toatasi lava si loomatua lea e i luga le, o ona faia, i luga i Vailima, e i ai ma le isi toeaina Savaii la na te faia le mea lea. Ae e le i taitai oo i le tulaga e tatau ona oo i ai. Lau Afioga i le Fofoga Fetalai, e le faigofie e fai si lavelave. Ae o le mea pitosili ona taua, a fai sau faatoaga vanilla, e le gaioia e se isi, e fai ai se latou toonai i le Aso Sa, e pei o le tele o tatou mea ia e i ai nei. E te fiu e faatoa, e alu atu ua gaioi solo mai e tagata. A o le mea la lea, e faigata ona tagofia e se isi aua e le iloa fai. Lau Afioga i le Fofoga Fetalai, o le faamatalaga lena.

SUI FOFOGA FETALAI: Ua ou matau atu ua soisoi le sui usufono mo Salega i Sisifo, e faauigaina ua malie atoatoa i le saunoaga a le Taitai o le Malo, e le faigofie foi le faamoemoe e pei ona i ai le saunoaga. E lelei ona e tulai mai, ua maea lou taimi.

Tofa Olo Fiti Afoa Vaai: Lau Afioga i le Fofoga Fetalai, e puupuu lava leaga o lea ou te molimauna le taua o le saunoaga a lou uso.

SUI FOFOGA FETALAI: O se mea e fia faasao, faamalamalama?

Tofa Olo Fiti Afoa Vaai: Faamalamalama lau Afioga. Lau Afioga e taua tele le mea lea ua saunoa i ai lou uso a sui usufono o le matou itumalo. I le 2014 sa ou fesiligia ai foi se vaegatupe e ova foi ma le \$200,000 sa faaalu i le atinae lea o le vanila. Ma sa agai foi i ai le Komiti a le Palemene i Olomanu i Mulifanua, toetititi pe 4 pe 5 eka ua uma ona toto e le Esetete. Sa ou manatu la faapea ai ua fesiligia e le sui mamalu, pe mea ua i ai se faalautele foi lea. Matou te o atu foi i lena taimi ua amata ona fua, e le i i ai ni tamai manu i lena vaitaimi. Ou te talitonu lava sa faapea ua i ai se faalauteleina, ina ia aoga tupe ia a le Malo, sa faaalu i le atinae lea. Ma le faaaloalo.

SUI FOFOGA FETALAI: Faafetai. Se i tulai mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o la ua faagasolo le faatoaga lea. A o la e i ai le faamoemoe i le latou faigapaaga lea ma tagata ia, e pei ona saunoa le Afioga i le Minisita, ou te lagona e tele se seleni a le Esetete tausii e maua mai ai, pe a fai e o mai tonu lava tagata ia ua masani i le process ina o lena foi vaega o le faatoaga. Ma o latou foi e feagai tonu ma le maketiina o mea ia i fafo i Iapani. Lau Afioga i le Fofoga Fetalai, e fai lava sina lavelave, o le mea lena e manaomia ai tagata e i ai lo latou tomami, i le maketiina ma le tulaga foi lea i le process ina o mea o le vanila i totonu, ma tapena ai loa mo le lauina atu i fafo.

SUI FOFOGA FETALAI: Masalo o lea ua manino atoatoa, ae ou te tapa le sui mai Salega i Sisifo. Tulai mai e faamaea lau saunoaga, ua maea lou taimi.

Afioga TOOMATA AKI TUIPEA: Lau Afioga, faapea e i ai se isi 15 minute lea ua toe amata nei i le afiafi. Ae pule lava lau Afioga. Ae o le a ou see ese mai le Matagaluega o Faatoaga.

O le Matagaluega o le Soifua Maloloina, e momoli le faamalo ma le faafetai, i le Afioga i le tamaitai Minisita aemaise foi o le Kapeneta, afioga i le Palemia, ona o se tofa ua ae, e faatagisia...

SUI FOFOGA FETALAI: Malie lau Afioga ua uma ona ou faailoa i luma o le Maota ua maea lou taimi, faapea ai o le taimi lea o le a e saunoa ai aua lou itumalo ma le tapuaiga.

Afioga TOOMATA AKI TUIPEA: Lau Afioga e toe tasi lava, o le Soifua Maloloina ona tuu mai lea o se avanoa e fai ai se tala i le itumalo, ma lou faaaloalo lava.

Le Soifua Maloloina, e \$3 miliona lea ua faaagaga mo le fausia o ni fale ma le faaleleia o falemai i itumalo, aemaise o fale mo nai alii ma tamaitai fomai, o lea o le a tofia e nonofo mau i falemai faaitumalo. Ou te momoli le faafetai tele, ua talia le talosaga ua leva ona talosaga atu ai, na i o matou sui usufono, aua lava lea auaunaga mo matou tagata i falemai i tua. E ui lava ina e tele na i mataupu ia e fia laga, ae o le a faamuta leaga ou te usitai i lau Afioga.

Ae avea ia lenei avanoa ou te faatalofa atu ai i lou itumalo pele, o Salega Nu 1, o Salega foi i Sisifo. E mai Fagafau, Samata i tai, Samata i uta, Fogatuli ma Faiiai. Le paia lava lea i le afio o Fualau ma le aiga o sa Fualau, afifio Sua, Maia aemaise o Gisa faapea Tilafono ma le Faavaoga. Lau fetalaiga Tuisalega o oe o le fofoga o le itumalo, faamalo. Afio Afualo ma le tofa Uano, faapea le fetalaiga ia Fuaimanu le fofoga o le usoalii. Afifio alo o Lilomaiava, lau afioga Seve ma Tilamafaga, afio Tuimaugapo ma le aiga sa Tuimaugapo, pola puipui e le falefa o Sasoa ma Samai. Ona ou oo mai lea i si ou nuu pele o Samata i tai, Samata i uta. Afio lau afioga i le sao ma le toafa o alii i tai ma le toa tolu i uta, aemaise foi Saleutogipoe, le limamatua o faleupolu o tofiga. Faafetai mo la outou tapuaiga, e maua ai le manatu o le sui usufono o lo outou itumalo. Faafetai mo fautuaga lelei, aemaise foi susuga i faafeagaiga, o lo o faapena ona faanonomanu ma fai tatalo, aua lava le Malo o Samoa ina ia manuia, toafilemu maua le nofo lelei. Ou te talitonu o lo outou vaai lava i le tele o le vaiaso o lo o ou i ai i lo tatou itumalo, e le faapea o alu atu e faatosina outou, ae ou te alu atu lava, ou te masani lava e asiati atu i si o matou nuu ma si o matou aiga, ma o tatou talatalanoa. O lo o i ai le fuafuaga a le Komiti o lo o faasavali atu nei i Savaii, mo le lauliliuina o le Tulafono. E pei lava ona outou silafia, ua agia i luga o le TV. O le vaiaso o le a sau po o le vaiaso i tua atu, o le a oo atu ai i le tatou itumalo. E talitonu o le itumalo malamalama ua lava le tofa ma le faautautaga. E le faaseeina outou e nisi, e le pule mai tua le itumalo, o la e i ai le tofa ma le faautautaga, tamalii ma failauga. E soalaupule ai mea faapenei i le tofa mamao ma le faautautaga loloto. O outou mama na aua nei faaseeina outou e nisi, ia toa pea le tofa, tatou feiloai pea. A i ai se mea e le malamalama ai, ia fesili mai. Vaavaai i le TV, o lo o alu atu ai faasilasilaga, faasalalauga, ia outou malamalama lelei ai. Ae aua nei o atu nisi faasee outou i fasipepa, ma outou seetia ai lea.

Ia alofagia lau Afioga i le Fofoga Fetalai, maua pea le tofa mamao ma le faautautaga, sui tulaga ai i le Fofoga Fetalai, ina ia sologa lelei gasologa o le Palemene i totonu o Samoa. Faamanuia le Atua ia te oe, ma lou faaaloalo lava soifua.

SUI FOFOGA FETALAI: Ua faamalo saunoa i le sui usufono mamalu mo Salega i Sisifo. E masalo foi na e fesilisili i tulaga o mea tau faatoaga ma faigafaiva. Aua o oe le isi sui mamalu ua leva ona tautua i le Malo e ala i le Matagaluega lea. O le mea lea ia faamalo saunoa malo tapena, o la ua

faafofoga lou itumalo, ua manino auofala i tulaga uma, ia ae le i malaga atu i ai le Komiti faapitoa a le Palemene. Ua avanoa foi le....se i tulai mai le sui usufono mo Vaimauga.

Afioga SULAMANAIA FETAIAI TAUILIILI TUIVASA (Vaimauga Sasae): Ou te faafetai i le Afioga i le Afioga i le Fofoga Fetalai, i se avanoa foi o lenei itumalo. O lea ua tatou i ai i taimi o faigalotu, ia avea ia faigalotu a le atunuu, o tapuaia o tatou faiva alofilima e tatou te o faatasi i luma o le silafaga a le Atua i lenei itula o le afiafi. A o le i faia se sao o lenei itumalo, e muamua ona momoli le agaga faafetai, faafetai i le Atua ua mafai ona faaauauina mai le fonu po a le atunuu i lenei itula o le afiafi. O lau lea faafetai. E fia fai foi se sao o le lenei itumalo o Vaimauga i Sasae, mai lava i Fusi ma fanuatanu, Lalotea le malae o le faautugatagi a Tumua. Niniva ma Punialavaa, Pilioua ma Fatutolo. Po o le afifio o paia i aiga e lua aemaise le nofoatula. E momoli pea le agaga faafetai.

E faatalofa atu ai i lea itu o le Maota, afio lau Afioga i le Taitai o le atunuu, le afioga i le Palemia po o le taitai o le Maota. Faatalofa atu foi aua le afio o le sao faapito, Afioga i le Sui Palemia, ae a le paia i le Kapeneta, afioga i Minisita lagolago. E faatalofa atu foi i le Fofoga Fetalai, i le taitaiina foi o le Fonu i lenei itula afiafi, ia faamalo. Liliu mai foi i lenei itu o le Maota, ia faatalofa atu i le afifio foi i Afioga i alii ma tamaitai o sui usufono mamalu o le Palemene o Samoa. E faatalofa atu foi i Ofisa Sili o Pulega o Matagaluega o le Malo aemaise foi o outou o lo o tautuaina si o tatou atunuu. Le failautusi o lenei Maota, ia malo, malo le tautua, malo le tautua atunuu. E fai foi se sao o lenei itumalo, e faatalofa atu i le tapuaiga a Le Ao mamalu o le Malo, afioga i le Tuiaana Tuimalealiifano ma le masiofo. Faapea le afio foi o le sui o le fonu a sui tofia ma le faletua. E faatalofa atu foi i le tulai mai o le Faamasino Sili. Ia o ou faiva na, e le faigofie lou valaauina. Aemaise o le Peresetene, afioga i alii ma tamaitai faamasino o le Faamasinoga, aemaise o le Ofisa o le faamasinoga. Ia tapuai maia, aemaise foi o le tapuaiga o le au faigaluega paia a le Atua i so o se fatafaitaulaga. O lo o nonomanu i le Atua e ala i tulivae, anapopogi ma tatalo i le Atua, aua se manuia o Samoa. O outou mama na, ia tele ni agaga aua le Atua ma lona finagalo. O le tapuaiga foi a Samoa o lo o taputapu mai i maota ma laoa, ia tapuai maia se i fai so tatou sao, aemaise o si ou itumalo pele, o lo o tapuai mai i lenei itula o le afiafi. Aemaise foi o na i matua i atunuu mamao, ma e o lo o faalogologo mai i so o se tafa o lenei lalolagi, ia se i fai se sao o lo tatou itumalo. Aemaise o le tala mulimuli lenei o lenei foi Nofoaiga.

E muamua ona faafetai i lau Afioga i le Minisita o Tupe aemaise le Minisita lagolago ma lau pulega, le Ofisa Sili ma le Pulega o tupe. E le faigofie, ina ua ou faatoa ulufale mai i le Maota lenei i lenei Nofoaiga. Sa vaaia le tala muamua autu, i le itiiti o le faaso sa i ai. Ona o le a? Ona o le manatu alofa i le atunuu. O lea ua oo mai lava i lenei itula, o lo o i ai lava mea i ou lima.

Faafetai i le pule faafetai le faasoasoina o le tamaoaiga o Samoa. E fai mai e lulu lava ma loimata, ae a le seleselega lea ua i ai. O lea ua o tatou aulia mai lenei Nofoaiga po o le tala mulimuli lenei o le Nofoaiga o lo o i ai lava mea e tua i ai le Malo. O lou agaga faafetai, aemaise le Matagaluega o tupe ma le faasoasoina. Aua e leai lava se Matagaluega e le fia manao e tele sana paketi. E o atu lava ma faasoaso ma taumafai lava le Matagalega ina ia faaitiitia. Ae o le agaga faafetai lea i lau Afioga i le Minisita o lea lava e i ai a tatou tupe. O le aotelega e momoli le agaga faafetai. O lea foi e matatia lenei Nofoaiga, na ou vaai ua 3 ia tala e faaopoopo, 1, 2, 3, o lea lava e foai e le Atua. Ua tatou oo mai foi i lenei vaiata i le faamai oti o lo o i ai, o lea lava e malupuipua Samoa ona o le alofa o le Atua, e faamalo. Ae o nai tuualalo lau Afioga i le Minisita, e tele nisi mea sa fia talanoa i ai le sui usufono, ae o lea ua maua i nisi o lauga. Se i silasila ane i tulaga ia o penefiti ia ua faamatuu foi. Faafetai i le faasoaso, ae o lau ia tatalo, i nai vaega foi ia, mo mai tumau o le tino ma le mafaufau. O lea ua ave lau faasoaso i nisi o tulaga, ae na i tagata foi nae pipili i totonu o auai. O isi e tauaso pe le mafai ona i ai sau faasoaso. O mai tumau e le i oo i le 65 tausaga. A o ni mai tuga i totonu o aiga, ni mai ua faataotolia, pe le mafai ona ave i ai sau faasoaso. Vaai foi i le Tala o le tupe i le tele o tulaga lena i mo mea o faalauiloa o lo o faatinoina e le Matagaluega o Tina ma Tamaitai, ae leai ni tupe e tufa i nai tagata ia ou te talanoa atu ai. Pipili, tauaso, le atoatoa...o le tele foi o nai aiga o lo o tausia nai ia tagata mai tumau i totonu o auai, se i silasila ane i lau faasoaso. Aua e ui lava i lenei paketi, e le toe suia ai lava, sa ta naunau faapea e fai muamua ni tulaga foi na e avatu ai foi ni manaoga o itumalo. O le itumalo lenei e oo mai lava i lenei itula e le i faia ma ni auala galue. Sa tatalo mai lava i le amataga ae o lo o faalogologo mai le Minisita o le LTA i lea tulaga. O lau tatalo lena le Minisita o Tupe, se i silasila ane i le tulaga lea. O le isi o vaega, o le tele ia o faalauiloa po o mea foi ia e maua ai fesoasoani. E matauina lava ma le faanoanoa le faafaigata. O le tele ia o talosaga a lenei itumalo sa avatu i le CSSP ma mea faapena. A o le faigata ia o process, e avatu teena fai mai e sese forms. Sa ou oo lava ma ou talanoa i ai i na tulaga. Mo mea o atinae e avatu i totonu o pulega a alii ma faipule, ma komiti tumama, ae teena. Ae se i tuu atu i ou autafa, se i silasila, se i oo lava auaunaga ia i tulaga pito i mauualalo a o tagata e le lelei le tamaoaiga. Aua o le tele foi o nei tulaga e i ai e aumai ai fesoasoani ia i fafo, ae le o lelei ona fai faalauiloa. E pei o lea e silasila i luga i e i ai tamaoaiga o aiga ae le o oo lava i le tagata lea e fagota i le ao. A matau i le itumalo lenei o le Vaimauga, ae fia ai pe e te taumafai i mea ia o fagu vaga, o o lava e aumai ai le tamaoaiga. O tagata tonu lava na o lea e manaomia le fesoasoani, ae a? E le o maua e tagata na ona leaga o lea foi na faalauiloa foi e le isi sui usufono, faafaigofie ia avega, ma fai faalauiloa i mea e access i ai le mamalu o le atunuu. O lau lea tatalo i le Afioga i le Minisita o Tupe.

Amata mai i le Minisita lea o Afamasaga, o ia na matemate malo. Faafetai i le tele o au cable ma au mea lea ua sau i totonu o le atunuu. O lo o matauina lava le slow o le mea lea e i ai, taugata foi ae tatalo, pe le mafai ona toe faamatuu nisi laisene i nisi kamupani e o mai ai i totonu, e o mai e access i lau cable ma mea faapena, e faafaigofie ai le auaunaga o le mamalu o le atunuu. O lea foi e maua i nisi o saunoaga analeila, faapea ua toe faatau atu a tatou kamupani ia. Se i silasila ane i lea tulaga pe moni ia, leaga a faapea e toe faatau atu i se tulaga faapena, e tatau ona i ai se tatou tupe e maua mai i le tax, mea o le mea foi lea o le capital gain i le toe faatauga atu. Se i silasila ane i lea, a o lou tuualalo atu, se i silasila ane i le tulaga lena. O nisi o kamupani na o mai e fai telefoni, ae uma ifo ua fai ma hotels, se i silasila ane i lea tulaga. O le tele o tupe na e maua po o fai ni lafoga ma ave e tuu mai totonu o le atunuu. O le tatalo a lenei itumalo, ia silasila ane pe le mafai ona faalauiloa nisi kamupani e o mai i totonu, ina ia tele nisi. A tumu lava le pasi ua manaia foi lena. Aua e pei e le o faaaogaina uma lena tulaga e aumai. Faafetai ia oulua ma le Minisita lagolago ua ola si o matou nuu lea o Laulii. O Laulii e tu i totonu i le va o mauga, i le TV e moni lava o la e nenefu, ae faafetai o la ua vaai lava si ou itumalo o la ua oo atu. E momoli atu ai le agaga faafetai ia oulua foi i lena tulaga.

O le isi, o le Minisita le o Faamasinoga, o se uo, tama o le Vaimauga. Faafetai i le lua tulai mai ma le Minisita lagolago i le lua Tulafono lea e vavao ai le atunuu. E iloagofie lava se mea lelei e faapena e lelei sona taunuuga. Faafetai o lea foi ua tulai mai le Faamasino Sili aemaise o le CEO, e tele suiga manaia ua i ai i totonu o le ofisa o le faamasinoga. O lua mama na.

O le Minisita lea o Aoga, faafetai lava Loau, faafetai le umusaga o le faleaoga o matou i Fagalii, e lagona lava le agaga faafetai. Aemaise foi ou te faafetai faapitoa foi i le faamatuu atu o le Ekalesia lea Mamona ua mafai foi ona ofo alofa atu i nofoa ma kesi. E le gata ia Fagalii a o Letogo. O le tatalo lau Afioga i le Minisita o Aoga, i le matou nuu i Fagalii, e leai se malae taalo. Silafia foi o lea ua aveese le malaevaalele. Pe le mafai ona talosaga e ui atu ia te oe, vaelua le malaevaalele, vaelua ae fai ai se malaetaalo, e le gata o le aoga a o lenei foi afioaga. Ua leai se malaetaalo ua ave uma eleele o le Malo e leai se mea e tua i ai lenei nuu. O lau tatalo lea i lau afioga i le Minisita se i silasila atu. O le tele ia o galuega lelei, e le selu atu, faafetai i le tulai mai o lau afioga.

Le Minisita lea o Tupe maua, e momoli le agaga faafetai. O lou agaga faafetai, o i lea o le ivitu lea o le atunuu, o lau Matagaluega o Tupe maua. E lagona le agaga faafetai i le tulai mai, e pau lava le faanoanoaga, ua vaai atu o lea e pei ua toe oso i lalo lau paketi. A o lea ua Fonotaga ma le amataga o le tausaga lenei o lea ua e alu ai i totonu o le system. E faapea la o le a e alu i totonu ua toe oso i luga le mea, ae o lea alu alu toe oso i lalo. E tatalo atu pe faamalosi compliance. O le tele o tatou tupe o lo o i ai foi i totonu o le

Matagaluega e le selu atu. O i lava le ki ma le tatala lea, masalo o le 90% o le tupe o lo o aoina i totonu o le tatou Malo, o lau Matagaluega. O oe lea e avatu ai le faatuatuaga o le atunuu ina ia ao uma tupe. E tele a tatou tupe o lo o i ai ma nisi mea e le o i ai, ae faamalosia le auaunaga a le Matagaluega. Ina ia mafai ona oo uma i ooooga e tatau ona oo mai tupe. Vaai foi i nisi o pisinisi ia, e tasi lava le vaai, faamalosia le o i tua o lau Matagaluega. O i tua e feoi ma vaai pisinisi ina ia aumai i totonu. E te le talanoa o i le system, o lea e vaai atu nei i le system, oka se taugata. E mafai lava ona avatu lau system taatia i autafa ae manual lava mea a Saina ia e i ai, e leai lava ma se mea e faaaogaina i le systema la e taatia, e leai lava ni lisiti. Fai faalauiloa i le atunuu, ina ia oo i le taimi e fai ai lau faatau, tapa sau lisiti.

O le tulaga i le auaunaga i le Matagaluega lea o falepuipui, e momoli le agaga faafetai, e le faigofie le avega ua tuuina atu i lau afioga, e le gata o le Minisita o Tupe Maua ma lafoga ma le custom, a o le falepuipui, e le faigofie. O lau tatalo, ia tautuana le tulaga lena i na i tagata faigaluega, ina ia malu puipuia. Ia fai ni insure, aua o isi lava pagota e le nofonofo loa foi, fai ni insure a leoleo ma e o lo o i le falepuipui, ina ia, o a mea e tutupu mai, a la e i ai mea e sefe ai latou. Aemaise foi o le tulaga lea o le ovataimi, e oo foi i le Matagaluega o leoleo e le o i lalo o le labour foi lele, faapea a maua le ovataimi pe faigaluega i aso malolo, e leai, e eseese lava tulaga ia, se i silasila ane i lea vaega. O auaunaga ia o i latou ia o lea e mamalu ai le atunuu. O lea e mamalu le atunuu i alii mamalu o le Malo aemaise o le falepuipui, se i silasila ane. O lea foi e faamatuu atu le tulaga lea i o i le malaevaalele lea i Fagalii, lalo o lau puleaga, o lea ua tuuina atu. E tatalo atu e ala atu i le Minisita o Tupe, o lea ua ave le \$5 miliona lea mai o i le Matagaluega lea e ave i o i le Matagaluega lea o Vaalele. A o lenei nuu e ona eleele lea e tu ai le malaevaalele. E leai lava se tala, aveese atu le malaevaalele, ae o la matou te vaai ma malupuipuia. E tatalo atu i lau Afioga i le Minisita o tupe, pe le aumai se isi miliona ma le matou nuu o Fagalii. Silasila i ai o lea foi ua o atu aveese le malaevaalele ave i tua, a o lea foi ua toe avatu lenei foi Matagaluega, o la e vaai ma malupuipuia i o tatou lafanua. E tatalo atu, o lena e \$5 miliona pe aumai se isi miliona ma si o matou nuu, e faamaumauina ai pea le vaai faalelei o aseta ia o meatotino a lo tatou Malo.

Le Minisita o le Soifua Maloloina, e le selu atu, faafetai leaga o oe o le tagata lotu. O le ala lea o le faamanuia o le Atua i le lua pitolaau, e le faigofie. Faafetai i lou taitaiga o le Matagaluega aemaise le Ofisa Sili ma lana Pulega ia e le faigofie lo outou valaauina. Agalelei le Atua ma faaauau. O le mitamitaga o lou sui usufono, e vaai atu i le Tala o le Tupe i le toe faaopoopoina o seleni ia e ave i o tatou tagata i fafo. Faafetai i lea foi seleni, e le o lava foi. Ae pei o le tele foi o si o tatou atunuu e mana lava e ave i fafo, e ave lava i fafo, o le agaga fiafia lea. O le tatalo faafaigofie na auaunaga. E moni foi ua i ai seleni e ave ai i fafo, a o le process foi e ave ai i fafo, ola ola le faigata. O le tatalo faafaigofie mea i si o tatou atunuu.

Faamanuia foi le Atua i lau Afioga i le Minisita ma le Minisita lagolago aemaise lava le tama Vaimauga lea e faatuatuaina le CEO a le Matagaluega lea. E momoli le agaga faafetai i le pulega.

O le Afioga i le Minisita lea o Lopaoo, ia faafetai. O le itumalo lenei o Vaimauga, silasila foi ua ave uma lava fanua o le Uesetete. Na o mai loa le Uesetete, e pau lava lea o le mea na o mai toto, o le koko ma le niu. Ona e a? E iloa lelei e le Uesetete o tatou laufanua e maua ai le popo lelei ma le koko lelei. Faafetai o lea ua toe atinae le tatou tamaoaiga lea. O lau tatalo, pe le mafai ona fai ni ponesi ina ia mafai ona, ae tuuina atu i totonu i le pulenuu. A faapea e 1,000 koko pe 1,000 popo, ave i pulenuu e tufatufa, ina ia uma lava le isi vaitau ma ua tatou vaai ua tele ina aumai i fafo popo e faatino ai pisinisi ma nisi fuafuaga ona e le o lava le tamaoaiga lea. E tatalo atu i lau Afioga i le Minisita, ia toe silasila ane i lea vaega. Ua matagofie mea uma ona o lou tulai mai. O lea foi e matau foi ua i ai le pasiaina foi o lau vaega lea o le SROS ia faafetai ina ia maua mai ni tatou tupe. O le tulaga foi lea o le faamatuina atu o le tulaga foi lele, o lea na saunoa i ai nisi sui usufono, faafaigofie. Aua e mafai foi ona tufatufa ia fatu laau ia e aumai, ia o le faafaigata foi ia. Matou o atu foi i tiapula se i tulou, ua ave uma e isi, se i faagafua mai i tagata sao lava, o la e galulue sao lava i faatoaga ma tagata taitoatasi. E taua foi e le sui usufono mo Salega, se i silasila ane i le tulaga lena o le fai, pe le toe mafai ona tatou toe faamalosi le tatou fai palagi aemaise foi o misiluki. O le isi mea taugata lena i si o tatou atunuu i totonu o faletalimalo. O lou agaga faafetai lena i le tulaga i le Minisita o Faatoaga.

Sala, e faafetai atu i lau Afioga, o le tatalo, se i tautuana mo mea o, na matou i ai i Savaii. Leaga foi o matou o tama Upolu lava. Ua ta fia vaai lava po o fea lea nuu. Fesilisili atu i le Taitaifono, o fea lea nuu. Toe taumafai tatou sign tau ma faailoa ai igoa o afioaga, O le taimi foi lenei ua le toe i ai ni turisi mai fafo ae o lea ua toe turisi lava tatou. Ia o tatou iloa, e o atu ma fanau e o atu i Savaii i le manaia o auala la e i Savaii. Ae le iloa po o fea afioaga, o fea ia nuu. Se i toe silasila ane i sign na e faamautu le tulaga lea. O le tulaga foi aua o lea e ia oe le Uesetete, pe mafai ona faamatu mai nisi lisi i le mamalu o le atunuu, ina ia mafai ona o e atinae ai foi le tulaga lena o le Uesetete.

O tina ma tamaitai e momoli le agaga faigata. O le tele foi o tulaga i atinae ma le tulaga o lo o faatinoina i totonu o lau Matagaluega, o le vai tumaoti. O lea e i lalo o lau Matagaluega o le vai tumaoti, e matauina lava, leaga o le itumalo lea o Vaimauga, o lo o i ai afioaga e o i le vai tumaoti ae i ai foi nisi o afioaga o lo o lava i le vai a le Malo, ona o le tamaoaiga o le suavai. Se i toe silasila ane lau Matagaluega, o le tele o tulaga lea na fai ai poloketi o tanevai lea sa faatino ai. E leai ma se mea o toe faaaogaina. E leai lava ma se mea na o le maua lava o tupe o konekarate na faia, ae e leai se mea o la ua toe bypass lava e matou ia e alu sao lava le vai ia i le mea na sau ai, ona e le o faamalieina. Se i toe silasila ane, a o i ai ni tupe o totoe, aua le toe

faamatuuina i konekarate ia, ae tuuina atu sao i le Matagaluega i matou afioaga.

O le Minisita o le LTA, ia Papalii, e le selu atu. O oe o le tagata lotu, e oo mai i le taimi lenei, e leai ma se auala galue o lou itumalo. Sa ou tatalo mai lava i le amataga o lea o le a iu lenei Paeaiga. E le tee la, ua faatiga taliga i si ou itumalo.

O le afioaga lea o Laulii e pei lava ona ou talanoa atu, e lumafale i moana ae tua i papa. E fai o le aia mai o le taligalu, sau e leai se ava toetiiti lava fafati i totonu o maota ma laoa. Ae a sulu atu i tua e mauga. E fiu foi e fai atu e na o le sua lava o se auala e alu i luga e leai. Ua leva foi ona fia fai se polokalame se i o i luga o mauga, ae e le mafai ona o i luga o mauga e leai ni auala e le mafai ona sua. Se i tuu atu i ou autafa lea tulaga aemaise foi auala galue o Vailele, Letogo ma Fagalii leai lava se mea o faatinoina e oo mai i le taimi lenei. Se i tautuana o lea e maua le taimi, aemaise ai foi o auala ia na ta o ai uma na fai ia le ta asiasiga, ia o lea e oo mai lava i le taimi lenei e le o... e oo mai i le taimi lenei ua uma ona tautino mai a vaai ia lo matou itumalo ia te au e pei ua... ou fai atu ua uma ona ma o ai ma le Minisita. O lea e silasila mai le Minisita.

Susuga Hon Papaliitele Niko Lee Hang (Minisita o Galuega): Lau Afioga i le Fofoga Fetalai...

SUI FOFOGA FETALAI: Malie le sui usufono o saunoa ua taliga lava e fialogo ia le saunoaga ae se i tuu le avanoa e saunoa ai le Afioga i le Minisita.

Susuga Hon Papaliitele Niko Lee Hang: Faafetai i lau Afioga i le Fofoga Fetalai mo le avanoa. Ia e fou auala ia e saunoa mai ai le afioga i le sui usufono. Na o le auala e alu i lona maota lea na ma o asiasi. O lea la ua fai, ae o auala galue ia, na alu le asiasiga a la matou Matagaluega po o le Pulega, o auala galue ia na tatalo mai ai Laulii. E alu i luga o mauga, e le mafai ona fai se auala seiloga e aumai ni masini faapitoa e eli mai ai mauga, ae o la ua tapena ai le isi auala la e alu i totonu o le afioaga, o lea foi la na tapena ae o lea e le i maua lava se tupe.

O lea e faasolo atu lava galuega ia e faamauina, ae o galuega la o auala galue o le afioaga i Vailele, ia e ta te le i o lava e asiasi. E pau lava auala ia alu i i totonu o le aai ma le auala lea i lou maota lea la ua faatino le galuega na ona o lou tatalo mai. Ae o isi la galuega la, ia taatia mai o le a ou alu atu foi e ta te o e asiasi i isi galuega ia ma faamautu mai ia po o a isi galuega faaopopo ia e te toe tatalo mai ai, ma le faaaloalo lava.

SUI FOFOGA FETALAI: Ia faafetai, ia tapa le sui usufono mamalu e faaauau ia le saunoaga.

Afioga SULAMANAIA FETAIAI TAUILILI TUIVASA: Ia ou te le finau i le Afioga i le Minisita ona o le tagata e lotu le tagata. Ae o le mea e fia faasao e le o le auala lea e alu i lou fale lea e fai. A foi o le ta fale e faasaga i le mauga. E ese le auala lea e fai, ou te manao e faamuamua le Mauga Fiafia lea sa palota ia oe. E le i faia ma se auala i o i Letogo e pei o le tulaga lea e te alu atu fai sao... o lou fale e pito i tua e faasaga i le mauga. E leai la se mea o la e leaga le auala i le sui usufono.

O le tele o taimi e ma te o ai fai mai ave taxi foi na, o gafea lou fale ma le fale o le sui usufono? Ia ae o la e ma te o i se taxi. Se matua leaga se lou auala. Ia ae tei ua o atu afe i le faleoo o le sui usufono, ia o le fale la lea o le sui usufono? Ia ou fai atu lea ia o lena. Ua e vaai i le malepe o le auala lea e sau i le fale o le sui usufono leai e le i faia taua o taua lea e i tua. Ia lea ua taatia atu i le tulaga lea i lou nuu.

Ia toe oo mai i le Afioga i le Saofaapito, lau Afioga i le Minisita, e pei lava ona ou tatalo foi i le nuu lava lenei o Laulii i le taligalu a matou o nei i le tulaga lea o le o i le malaevaalele, i le maualuga o mea o le faiga o taligalu. Ia ae se i silasila ane i lenei itumalo o Vaimauga, e amata atu lava i Moataa, ou te le faapea ae o Vaimauga atoa lava. E amata atu i le maualalo o le taligalu, e leai foi ni mea o tua i ai. Ia ae o lea foi na ou tatalo atu lava Moataa, Fagalii alu atu, o nuu nei e leai ni mea e tua i ai. E maualalo ia le siisii foi o le tai.

Ia malie foi lau Afioga pe mafai ona e silasila ane i tulaga foi ia i tatou tupe ia na aumai. O lea foi sa tatalo atu ai foi, aemaise lava ia le afioaga lea o Laulii. Ia aua a oso mai le sami i luma, ia e feosoi atu i tua ae pa mai ma le vai. E leiloa po o fea o le a o i ai. Se i silasila ane lau Afioga i le Saofaapito lau Afioga i le tulaga lea i lo tatou vaega lea o le siosiomaga. O le suiga o le tau na e i ai ia le tatou seleni na e aumai se i silasila ane.

Ia o le tulaga i le tamaoaiga o si o tatou atunuu, ia faafetai lava, faafetai i le Afioga i le Minisita aemaise foi e o faauluulu ai Ulu Bismarck i le vaega lea e taumafai e aua ne i aumaia i totonu tulaga ia o tatou tagata. Ia o lea lava e taumafai tatou e tau tatala, ia o lata ita lava tatalo i le Palemia, taofiofi ai pea faapea. E leai lava se mea o gase ai ia si o tatou atunuu.

O le tulaga foi i Niu Sila ma latou o i ai, ia e le o popole lava Niu Sila ia. E pau lava le mea o le fia omai o o tatou tagata e le o sefe lava. Ia ae faafetai e faaauau pea le aumai toe tuu pea i le 14 aso ina ia mautinoa ai le tulaga lea.

O le isi tatalo i le Afioga foi o le Minisita i le faasoasoina lava o mea foi ia, o lea ua tatou iloa ua matua leai lava ni tamaoaiga e maua e nai mea ia o hotels, faletalimalo. Pe le silasila ane i le faamatuina atu o nai tagata ia e omai, faasoasoa atu i isi faletalimalo e le o oo i ai le faasoa. Ia aua o isi tulaga na e i ai, ia o la pei o le a aumai po o le a le tulaga i le faasoasoina, ia ae tofua lava ia nai faletalimalo pe lua nai malo, ia inu foi latou i le tulaga lena.

E pei lava ona ou talanoa atu, o nei foi tulaga i lo tatou taunuu o lo o i ai, ia e moi lava o tulaga faapea ae ua tatala e fai foi e le Atua lea mea ia mafai ai foi ona toe atinae ia si o tatou atunuu tatou tutu lava i o tatou vae. O tulaga i lo tatou tupe maua la e i ai, ia o lea lava e tele ia tupe maua i lo tatou atunuu faatasi ai ma fesoasoani lea e faatino ai ia lo tatou atunuu. Ia o le tulaga lena e tatalo atu ai.

Ia o le tulaga foi i le vaega o leoleo lea e o e faatino ia le tulaga foi o le lokaina o faleoloa ia, ia se i fai fuafua foi ona o le tulaga foi o le Supamaketi, ia o Supamaketi ia taloka i le taimi lea o le 7:00pm, ia e i ai nai faleoloa foi na i nuu i tua lea e pei e o atu tagata o i totonu. Ia ua o atu nei la leoleo ma faamalosia faapea o la e ae o faleoloa lava na o nai tagata taitoatasi lava. E le mafai la e tatau ona silasila i laisene pisinisi, e vaai ai po o le a le ituaiga pisinisi ua i ai, aua e i ai pisinisi e issue i tagata taitoatasi. Ia o latou la na e saoloto pea i taimi ia e alu ai faapena. Ia aua e pei o isi faleoloa e o i totonu o tagata taitoatasi ua naunau e toe fai ia ni tulaga foi na e toe tapuni ina ia faamalie ai le Tulafono lea ae leai e tatau foi i le Matagaluega a Leoleo se i o e fai ae aua le o fai faapusalalau foi lea ae o e vaai. O le a le laisene o le tou faleoloa? Ia o laisene lava a tagata taitoatasi lena, leai ia alu oe.

Afioga Hon Tialavea Fea Leniu Tionisio Hunt: Lau Afioga i le Fofoga Fetalai...

SUI FOFOGA FETALAI: Ia se i tulai mai le Minisita o Tupe Maua ma...

Afioga Hon Tialavea Fea Leniu Tionisio Hunt: E le fia faalavelavea ia le saunoaga a le sui usufono, ae o le tuuaia o le Matagaluega o Leoleo i le faapusalalau o le latou galuega fai. E leai, o lo o follow lava ia le faatinoina o le galuega a le Ofisa o Leoleo e tusa ai ma tuutuuga o le Koviti. O lea lava e alu atu ia faasalalaua i fale laiti ia o tatou, a ua manao e fai ae tapuni ia faitotoa, tapuni mau. Pe lei piliki ae fai faamalama, pe afai o le fale laitiiti. Ae e i ai lava ia fale ia e laiti, ae tele oloa i totonu.

Na alu atu le asiasiga a Sole Traders ae laitiiti le fale e pe na o le 5 pusa o nai mea laiti i totonu, o lea lava e tuu le avanoa e tapuni mau faitotoa ae toe fai faamalama. Ia ona maua ai lea o se avanoa. Ae o le galuega, o lea e pule mai ia le NEOC i le Tulafono e faatino e leoleo, ia ae e le o pusasalalau ia le faatinoina o galuega a leoleo.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai masalo e le o malamalama le Minisita, e pei o so o se pisinisi laisene lava e issue i se Sole Trader, o le tagata e toatasi. Pe tatala la le faleoloa o le alu atu i totonu, o le Sole Trader e tatau lava ona tatala pea. Ae vaai la o le mea tonu lea na ou fai atu ai o la e sese. O le Sole Trader o le tagata e toatasi ae vaai le laisene. Ua tele ai fua galuega a isi pisinisi ua taloka

fua ma fai ai isi faamalama, ae o pisinisi a tagata taitoatasi. E le o se supermarket. E pei o le tulaga lena o lea e avatu ai...

Afioga Hon Tialavea Fea Leniu Tionisio Hunt: Lau Afioga i le Fofoga Fetalai...

SUI FOFOGA FETALAI: Malie la le sui usufono se i toe tuu atu lava le avanoa lea i le Minisita e faamanino le vala la e i totonu.

Afioga Hon Tialavea Fea Leniu Tionisio Hunt: Lau Afioga i le Fofoga Fetalai pe Sole Trader pe a, ae a savali i totonu ua tau o le Supermarket i le Tulafono a le NEOC lea e fai. Ae o lea e avatu le auala e faafaigofie ai, ae o so o se faleoloa lava e tatala o i totonu, o le fale lava lena o le supermarket le faatinoga i le Tulafono. E fai le Tulafono, ae e le o le Ofisa o Leoleo e ana le Tulafono. E le o se Tulafono foi a le Matagaluega, leai, o le Tulafono a le NEOC.

Afioga SULAMANAIA FETAIAI TAUILIILI TUIVASA: E le fia faafinauina le sui usufono leaga o i lea i le tulaga o le le malamalama o si o tatou atunuu ua o isi e toe fai fale lea e saunoa i ai le Minisita. E toe fai piliki ae o faleoloa lava ia a tagata taitoatasi. E pei la o le uiga na o lau tala aua o lea e faatino e leoleo ia le tulaga e o e enforce ia pisinisi ia e tapuni i le taimi lea, se i silasila ane i le vaega lena. E ta te le faafinau, ae e tatau ona o leoleo ma e e faatinoina, vaai le laisene po o le a le laisene po o se supamaketi po o le a le tulaga ina ia faafaigofie i si o tatou atunuu.

O le tulaga i le Afioga i le Minisita lea...

SUI FOFOGA FETALAI: E na ona ou faamanatu atu, i le sui usufono e manaia ia le saunoaga ae toe tasi lau minute lea e totoe.

Afioga SULAMANAIA FETAIAI TAUILIILI TUIVASA: E manatua lava le Afioga i le Minisita lea o le vaega lea i le ulupoo ma lana Minisita, mataulava i le TV faafetai lava i Pulega foi sa mafai ona taofiofi ia le tatou 2AP. Ia tatalo atu i le lua toe tulai mai, pe le mafai ona fai ia se tatou TV a lo tatou Malo. O le tele o le tulaga o lo o i ai ia si o tatou atunuu, faafetai lava i le TV lea e alu atu i luga o le tatou upega lea, faafetai lava ia po o le a le tulaga e na o... e pau lava mea na e omai i le TV lena e leai se isi e tautala mai ae po o le a le tulaga i lena channel ae ia faamautu ia se TV a le Malo, ina ia mafai ona ave sao lava ia o tatou manaoga. Ia aua o le tele o isi mea aua o le pisinisi mea ia e fai, e avatu e ese lava le tulaga e avatu ai ia le tatou...

Tofa Lealailepule Rimoni Aiafi: Lau Afioga i le Fofoga o le Fono...ia o lea e fia fesili i le sui usufono mamalu, o le saunoaga a le sui usufono mamalu, a lua toe foi mai e faaauau. Po o lea ua tofi maua e Minisita faaauau i le isi Paeaiga e le Afioga i le Palemia? Fai atu ai.

SUI FOFOGA FETALAI: Malie le sui usufono e na o mea e fia faamalamalama ma mea e fia faasao e faauilavea ai.

Tofa Lealailepule Rimoni Aiafi: Ae o le a le mea lea e faasao...

SUI FOFOGA FETALAI: O le a le mea lea e te aumaia? E le lavea i lalo i i, malie le sui usufono alala mai lalo. Saunoa le sui usufono lea toe tasi ia lau minute.

Tofa Lealailepule Rimoni Aiafi: E o se mea e fia faatu.

Afioga SULAMANAIA FETAIAI TAUILIILI TUIVASA: Faafetai i lau Afioga i le Fofoga Fetalai. Ou te le o talanoa atu e tataua ona tu mai le Minisita, e le talanoa mai ni Sui Minisita o le Minisita lea e avatu ai lau... E momoli lau faafetai i le Afioga i le Fofoga Fetalai e ava tele i lou tulai mai i lenei afiafi. E pei lava ona ou fai atu amuia oe, e i ai taimi e te alala ai i i. O lea foi ua siitia oe e le Atua i luga o lena nofoaga maua luga, faamanuia le Atua ia te oe. Tulai mai i le Taitaiga o le Maota, ua uma foi se tala a Vaimauga, ae ava tele i le Nofoa.

Ona faapea lea o se matou faamatalaga lau Afioga i le Taitai, ia malo le taitaiga o si o tatou atunuu. E leai lava se mea o gase, ona o le a? O lo o i ai ni Taitai e alolofa i le Atua. Faatotoe foi e le Atua outou toe ulutaia aemaise le faufautua i le Afioga i le Sui Palemia, o lea lava e see le sa o le atunuu. Faamalulu atu foi i tou Afioga i Minisita, ia e omai iinei e le mili faauua upu. E le selu atu foi ia te outou. O le tele o tui e tatui ai outou e tou te malolosi ai.

O ni isi o taimi o lea foi e vaai lava ia lenei itumalo, e le o galuega e faatino ai. E pau lava le mea o lea e faalogologo ia itumalo, sau lava ia le sui usufono lea o tautala lava aua o lea faatoa oso mai isi sui usufono tautala ua uma le taimi.

Lau Afioga i le Fofoga Fetalai, faamalo i lau Afioga i le Taitai o le atunuu, tau ma oe. O le tele o nei mea ia e tutupu i si o tatou atunuu, ia faafetai o lo o toa pea. Agalelei le Atua, faafualoa pea lou soifua, lava le onosai aemaise le faufautua. So o se se i tulou lava, so o se aiga lava e i ai se tina lelei, po o se aiga lelei, o la e lafi ai i tua se faufautua lelei o nai tina. Faafetai i le itupa o tina, o lea e malu ai lo tatou i lau fautua i le Saofaapito. Ia o le matou tatalo, liliu le faiva i lenei itu, agalelei le Atua, i lenei foi afiafi ma lo tatou fonu po, e pei e ta te tu lava e ta te lia, e ta te fia talanoa umi foi ae ta te ava tele.

Agalelei le Atua i le tapuaiga a lo tatou Tama, le Fofoga Fetalai o lo o taputapu mai, o lo o taputapuia ou faiva i lenei afiafi ia aulia foi le taimi e tatou te taliu ai ia aemaise ia le tapuaiga a Samoa.

Ia lou itumalo ia se i ou oo atu i si ou itumalo, faafetai i la outou tapuaiga, ia o lea lava e malosi ia le tou sui usufono i a outou tatalo. Ia faamanuia le Atua, o lau toe sau ma lou le toe sau, ia o mea na a le Atua ua leva ona iloa e le Atua le lisi la ua fai. Ae o tatou tatalo, ia tatou omai e fai ia o tatou taimi nei. O le a le mea ua foai e le Atua i lou malosi ia tautua atoa. Ia manuia ia le Fonousu a le atunuu i lenei po, ia manuia lena itu ona o le Suafa o Iesu.

SUI FOFOGA FETALAI: Ua faamalo saunoa i le sui usufono mamalu. Masalo a matau le Maota i lenei afiafi, ua tulaga ese lava ia lau saunoaga ma lau lauga i lenei Paeaiga, mai lava i le amataga o lea ua toe lava o se aga ona faaae lea o ou faiva. Ae o lea ua sui le tone e kiliva ai lou faamoemoe. E mafu i se a? Ua loloto le tofa, o le faautautaga ua tuu i le loloto. Ua faamuamua le Atua. O le mea la lea, ia o au faamanuiaga mo le Fofoga Fetalai ma le Nofoa ia faafetai tele. O lea foi ua to le matupalapala i le Tama o le atunuu, ia foi i le Atua le viiga, ia maua lau tofa, ia aua le faamoemoe o lenei Paeaiga.

Ae ua avanoa lenei foi vaega o le afiafi, ia mo se isi foi saunoaga. Ia se i tulai mai le sui usufono o Safata Sasae.

Tofa NONU LOSE NIUMATA (Safata Sasae): E momoli atu le faamalo ma le faafetai atu i lau Afioga i le Fofoga Fetalai, faatalofa atu i lau Afioga i le Taitai o le Malo, lau Afioga i le Palemia, le Sui Palemia, le Kapeneta, Minisita Lagolago. Faatalofa atu i Taitaifono ma Sui Taitaifono o Komiti Faa-Palemene, ma le mamalu o sui usufono. Faatalofa atu foi i Ofisa Sili o Pulega o Matagaluega ma Faalapotopotoga a le Malo. Ia faatalofa atu foi i lo matou itumalo, Safata i Sasae.

Lau Afioga i le Fofoga Fetalai, o le Tala Autu o le Tupe, na saunoa le Minisita o Tupe, o lenei Tala o Tupe ua tapena ao lutia Samoa ma le lalolagi i le faamai.

Lau Afioga i le Fofoga Fetalai, i le tausaga e 2019, na siitia ai le tamaoaiga i le 3.5%. I le tausaga e 2020 na pau le tamaoaiga o Samoa i le 3.3% ona o le faamai. I le tausaga e 2021, na pau le tamaoaiga o Samoa i le 2.3% ona o le faamai. I Malo tetele, ua i lalo ifo o le 5% le tamaoaiga i le taimi lenei ona o le faamai. A pau le tamaoaiga mai paaga i fafo, ua faaitiitia foi tupe ma meaalofa mai i fafo.

Lau Afioga i le Fofoga Fetalai, sa lelei ia le tamaoaiga o le tatou Samoa i le tausaga 2019. Sa leai se faamai. Na siitia tupe maua, na siitia tupe alu i atinae. I le tausaga e 2021, ua lutia ia le tamaoaiga o Samoa ona o le faamai. Ua faaitiitia tupe maua i le \$47.1 miliona, o le faaitiitia foi na o tupe maua. O le faaitiitia foi na o tupe mai i tiute ma lafoga. Ua siitia foi le tupe alu i le

\$42.7 miliona. I le faatusatusa o tupe maua ma tupe alu, e \$1 mai tupe maua, e faatusatusa i le \$1.14 tupe alu.

Lau Afioga i le Minisita o Tupe, faamalo i le Tala o le Tupe. Ua utiuti le faasoa, ae e tele mea o manaoga. Faalelei ia totogi o aufaigaluega, faalelei atinae, faalelei ia galuega faatino, faalelei o aitalafu, faalelei o turisi. Na e saunoa o le mea moni, o le a mautinoa le umi o le saili fofo.

Lau Afioga i le Minisita o Tupe, a cure ia le Koviti ae sau se isi faamai fou, o le a le mea e fai? Lau Afioga i le Minisita o Tupe, ou te lagolagoina ia le Tala o le Tupe, ma lau fautuaga ma le agaga faaaloalo, (1) ua tatau i le Malo ona siitia ia le rate o le DHC.

Lau Afioga i le Minisita o Tupe, e leai nisi tupe a le Malo sei vagana ua siitia ia tupe maua. (2) silasila le Malo i le numera o sui usufono. E toatele nisi e manao e faaopoopo ia sui usufono. E faapena foi ia lo matou itumalo. (3) silasila le Malo i le numera o Minisita. Ma le (4) silasila le Malo mo mea foi ia o Komiti Faufautua.

O le mataupu mulimuli lau Afioga, o lea e i lalo o le Tala o le Tupe, le lipoti faaletausaga 2019 a le Kamupani Vaalele Polenisia, o le aitalafu lea e \$24.1 miliona, o lea aitalafu e tuputupu. Ua tatau ona silasila i le fofo o lenei aitalafu.

O le Matagaluega o Galuega, faamalo i lau Afioga Papalii, e tatalo i lau Afioga, ia alofa i auala galue o Safata i Sasae. E 1 le auala i Tafitoala, ae 2 i Fusi. O le auala i Tafitoala, o le 30% o lea auala, e le mafai ona alu ai se taavale. O le tala foi i lo matou nuu o Fusi, a le faia le auala, ou te le alu i le palota.

O le Matagaluega o Aoga, faamalo i lau Afioga i le Minisita, lau Afioga Loau. O le tatalo i lau Afioga o le faleaoga i Fusi, ua leaga. Ua tele tupe ua alu i repair o le fale, taei le floor ma tutulu. Ua leaga foi ia windows pe a. O le a se finagalo? E a pe a oo atu ia Mati ua mae'a le fale fou.

Ia faafetai tele i lau Afioga i le Fofoga Fetalai mo le avanoa. Ia manuia foi le Fono a le Palemene. Malo.

SUI FOFOGA FETALAI: Malo le saunoa, malo foi tapena. E ui lava ina puupuu ae o le aanoa i le faafofoga a le atunuu e faapea foi i lou itumalo. O le mea lea, malo le onosai malo foi galue, o le tulaga lava lea o lo o faatino e lo tatou Komiti. Ia ua avanoa foi le, ia se i saunoa mai le sui usufono o Sataua.

Afioga TAPULESATELE MAUTENI TAMASONE METULI II ESERA (Vaisigano Nu.2): Faafetai i lau Afioga i le Sui Fofoga Fetalai, ia ai ona e faapea o taua o le uso. O lea ua e saunoa ai faapea o le sui usufono mai i Sataua. Utu, aua ne i galo ia te oe ia lo ta va.

SUI FOFOGA FETALAI: Ia saunoa le sui usufono mamalu o lea ua faasao atu Vaisigano Nu.2.

Afioga TAPULESATELE MAUTENI TAMASONE METULI II ESERA: Faafeiloai atu i lau Afioga i le Sui Fofoga Fetalai, lau Afioga i le Fofoga Fetalai ma le Fonousu a le Palemene o Samoa. E faatalofa atu foi i lau Afioga i le Palemia, Sui Palemia, Kapeneta faapea foi Minisita Lagolago. E faatalofa atu i Afioga i Taitaifono, faapea foi ia sui usufono o lenei foi itu o le Maota. E faatalofa atu i le Failautusi o le Ofisa o le Fono Aoao Faitulafono, i lenei foi itula e avatu foi le faafeiloai i le Afioga i le Faamasino Sili ma le Matagaluega o Faamasinoga, Ulu o Matagaluega ma Faalapotopotoga a le Malo, ma le mamalu o sasao nei.

Ae tulouna ia le faafofogaaga a le Afioga i Le Ao o le Malo Tutoatasi o Samoa ma le masiofo, le Sui foi o le Fono a Sui Tofia ma le masiofo. Ia tulouna ia le tapuaiga a le Malo o Samoa, i ona sa ma faigata e tumau e faavavae, ae tainane foi le faafofogaaga a le Motu i Sasae. O le tapuaiga a le aufaigaluega Paia a le Atua, o lo o faanonomanu aua se manuia o Samoa ae tainane ia lau faatofalaiga i le Fono Aoao Faitulafono aua se manuia mo o tatou tagata. Ia aemaise ia le tapuaiga a si ou itumalo Vaisigano Nu.2. Nai ou nuu o Papa ma Vaivaimuli ma Fagasa.

Lau Afioga i le Fofoga Fetalai, e nao nai manatu laiti lava e fia faailoa, ae e momoli atu le faafetai mo le Tala Faatatau o le Tupe 2020/2021 ua i lumamea nei. E faapea atu e lagolagoina e lou nei sui usufono i le Tala Faatatau Autu. E faapea foi ma le Tala Faatatau o Tupe Nu.3. 2019/2020.

Ae o le a muamua ia ona avatu se faamalo ma se faafetai i fuafuaga ma faatinoga a le Malo i ana atinae e pei ona faataunuuina mo le soifua maloloina, soifua manuia ma le tamaoaiga o tatou tagata. Ma e faafetai ai i nai atinae ua faatinoina foi mo si ou itumalo.

Lau Afioga i le Fofoga o le Fono e faafetai atu i le Minisita o le Soifua Maloloina, i lau lagolago ma ua matauina e lenei sui usufono, e foliga mai lava ua oulua masani lelei i le faatinoga o oulua tiute, ma e masalo foi atonu e uma atu lenei tausaga, ia ua faauuina ia ni lua tusi faafomai. Ae faafetai foi i le Pule Faatonu ma le Matagaluega ma le tou galulue punouai, ona ua soo lava le pagatia o si o tatou Malo i lenei faamai, o lo o outou taumafai lava e galulue ma le faamaoni aua le soifua maloloina o nai o tatou tagata. E momoli atu le faafetai i lau Afioga i le Minisita ma le Matagaluega ona o le tulaga lea ua mafai ona maua atu tatou fomai nofomau mo nai falemai i tua e pei ona i ai foi le falemai i Sataua. O se manaoga lava ua leva foi ona tatalo atu ai, pei foi sa faatiga taliga foi i le Afioga i le Minisita sa i ai talu ai nei, o le taumafai lava ina ia mautu lea tulaga ona e faigata tele le mamao i tua o nai falemai ia i tua e i ai Sataua. Aua o lea ua tulai mai le tulaga lea, o se tulaga ua matua lelei. E faafetai foi o lea o le a fausiaina tatou apitaga ia po o fale nofo ia mo fomai po o tausisoifua i totonu lava o nofoaga o lo o i ai

falemai. Ma o le a faigofie ai foi le faatinoina o galuega a fomai ma tausisoifua.

E avatu foi le faafetai ona o le tulaga lea i tausisoifua, o lea ua faamalieina lava le lava o tausisoifua i totonu o falemai i tua. E molimau atu pei foi ona i ai le falemai lea i Sataua, aua e pei sa i ai lava le tulaga lena i le faaletonu o fomai faapena foi tausisoifua. Ae faafetai atu foi mo le tulaga lena. O le talitonuga foi pei ona i ai tamaitai ia tausisoifua, e pei ua matauina lava le lava foi ma atoatoa aoaoga aua le tauaveina o latou tiute, ae o se tulaga lelei tele lea i le matau foi pei ona i ai.

O le isi tulaga e faafetai atu ai o le tulaga lava lea tau i nai a tatou fualaau ma vailaau, aua masalo o le isi foi lea faafitauli tele i nai falemai ia i tua, ona o le faigata ia o le malaga mai, a fua atu la i Sataua, e faigata le malaga mai i Faasaleleaga. E uma ona fai lau siaki i tua ona faapea mai e le o maua le vailaau po o fualaau. E tele lava foi nai faafitauli i le va foi o fomai ia ma nai tausimai, ona o le le fiafia foi o le tagata mai ia i ituaiga tulaga lea. Ae faafetai atu o lea lava ua matauina le faatauaina o lena tulaga.

O le isi tulaga e taua tele ma e avatu ai foi le faafetai, o lea lava ua matauina i le tatou taavale laveai lea e i tua i Sataua, pei o lea lava ua taumafai ia i ai le taavale lea i aso uma ia faigofie ai foi le faatinoina o tulaga faapea. Aua a fua atu lava i ai, e i ai le fuafuaga foi lea o lea sa faapea mo Savaii lava ia i se falemai foi lea e ono... faapea a uma loa Tuasivi, ia, mo le faafaigofieina o le faiga o galuega. E leai se isi falemai pe a fua atu i ai i le tulaga la e i ai, e pei o Sataua lava a tuu a i ina le tatou taavale lena ia tupu se faalavelave i isi mea ia e i autafa ae faigofie ona aumai ai. E pei o le tulaga lena foi lele i fuafuaga faapena ia silasila i ai.

Ae aveia foi lenei avanoa e faafetai atu ai i le finagalo malie o lau Afioga i le Minisita i le talosaga foi na tuuina atu i le Pule Faatonu. Sa i ai nai fomai fainifo sa malaga mai Amerika lea pei sa faaauala atu ai i le Pule Faatonu se talosaga, ina ia mafai ona faatino le galuega a nai fomai fainifo nei i le falemai i Sataua. E leai lava se isi o gasegase foi sa taumafai i ai nai fomai ia e le i lagona le agaga fiafia o na o le lelei faatino o lenei fesoasoani. Ma e avatu foi le faafetai i tamaitai tausisoifua o le falemai lea i Sataua, aua pei o latou lea sa fesoasoani i ai i le faatinoina o lenei foi auaunaga a nai fomai nei fainifo e toalua ma le soatau sa latou i ai.

Ona oo mai lea o se faamatalaga i lau Afioga i le Minisita mo Aoga, Taaloga ma Aganuu i le lagolago foi ma le Ofisa Sili o Pulega o le Matagaluega, i atinae ma fesoasoani e tele ua faatino i isi o matou itumalo aua lava le aoaoina lelei o nai fanau, ma ua tele lava le lagolago mai a le Malo ma ana paaga e fesoasoani ai mo nai a matou aoga tulagalua i Papa ma Sataua. O ia foi fesoasoani o lo o i ai foi ma nai isi lagolago mai isi faalapotopotoga e tauala mai ai isi fesoasoani esese. Ae pei lava ona talosaga atu i lau Afioga i le Minisita ma le Ofisa Sili o Pulega, se i silasila ane lava i le tulaga lea, e moomia lava ni faiaoga i si matou aoga lea i Papa ona ua le

lava i le taimi nei. Ae avea foi lenei avanoa e faafetaia ai le auunaga a le matou pule aoga sa i Papa ua faamanavaina e le Atua lana tautua, ae tatalo atu pea mo ni faiaoga, leaga i le taimi nei lau Afioga e toatolu nai a matou faiaoga, o la e atoa lava nai a matou vasega, e valu nai a matou vasega. O le isi a matou faiaoga o si faiaoga foi lea ua matua le soifua a o lea e talosaga mai ma toe avatu le avanoa. E pei la o le tulaga lena, o le faiga lava o nai aoga la e fai ai, e tolu le isi faiaoga i ana vasega, tolu vasega a le isi faiaoga, ae lua le isi faiaoga. E pei o le tatalo atu lena i lau Afioga foi ma le Ofisa Sili o Pulega, ona o lea lava ua tele nai fuafuaga foi a le Matagaluega i le taumafaiga o aoga a tamaiti, ae ua faigata tele le taumafaiga a nai faiaoga. Ia, e i ai lava le manatu, ua tele lava manaoga ua avatu i lau Afioga ma le Ofisa, ae te le o tuulafoai lava i si nei foi itumalo. Faafetai atu ai mo na galuega lelei.

Lau Afioga i le Fofoga Fetalai, ona agai mai lea i le faafetai atu i le Minisita mo Faatoaga ma Faigafaiva. E lagolago foi i le tou Matagaluega. Ua tele lava foi atinae ua faataunuina i si o matou itumalo i le tulaga o meatoto, aemaise foi o nai atinae ma faasao i le gataifale, e i ai le faisua lea lava e faamanuiaina ai nai o matou nuu foi. Ae tatalo atu i lau Afioga, se o lea e manaomia lava nai isi tiapula toto vaeatu le – mo si o matou nuu lea o Sataua. O le isi tulaga lau Afioga, e moni lava e le tele ni vaafagota o i ai nei, ae faafetai lava mo le taumafaiga lea o tatou pole fagota, ona e manaomia lava le mautu o nai a tatou pole i aau po o tai foi i le loloto. E pei lava ona talanoa atu ai, e mautinoa lava e le o faaletonu le tulaga lena, ae se i silasila ane lau Afioga i le Minisita, pe le ono maua sina poloketi foi lea se i toe fai ni nai alia fagota. E toatele lava le aufaifaiva foi o moomia vaa ia. O si o matou itumalo foi o la e feololo lava le aufagogota ae na o nai aiga lava na e lua la e i ai lea tulaga. Ae atonu e silasila i ai pe mafai ona maua se fuafuaga faapea.

O le isi tulaga lau Afioga, sa fai ai foi se faamatalaga i le isi foi a tatou fonotaga i le tulaga lea e moni lava i le popolega lea e i ai tatou i mea a nei o taavale, vaeatu le, o taavale afi, o le tulaga lea e i ai i le faatinoga o a tatou faatoaga. O lea foi e matau atu pei ona saunoa se tasi o sui usufono i le mea lea o le faafaigofieina o le galueaiina o faatoaga, e pei o le finagalo o le sui usufono o le tulaga foi lea sa folafola ai a tatou tractors a. E le o mea na o excavators a, o tractors mea ia sa talanoa atu ai. Ae a silasila lava i ai, o tatou faatoaga, ia taatia ia le tractor ia e mulimuli mai tua mai, ae a e malaga lava po o fea lava e te malaga i ai, e ta te alu atu lava o le tamai taavale foi lele la e tu mai i le faatoaga, tamai vans foi nei, i le faigata foi lele ona o le tulaga foi lea faapea i le afaina o le siosiomaga i mea o taavale. A o le faatinoga o tatou maumaga, e manaomia lava. O le tele ia o nuu e i ai foi le talaloa a si o matou foi nuu i uta, o le faigata ia. O lenei lava, vaeatu le paia o le Maota nei, o lenei lava e savavali i uta savavali i tai, savavali i uta savavali i tai. Pe le i ai lava se finagalo foi lea e ave le avanoa e aumai ai taavale ia matutua, taavale tuai, e mafai lava ona fai se tulafono e faagata ai tausaga o le taavale

ina ia mafai ona aumai ni pikiapu ma ni tamai loli ia e fai ai tatou faatoaga. A silasila i ai e le aoga ia tatou le, lea ua tatou mananao e aumai le tractors, aumai foi excavators. Ae pei o le mea lea e tataua ona muamua i ai ae pei o le faigata lena ona o le tulaga lava lena i le faaleagaina ai o le siosiomaga. Ae a silasila lava i le tele o atunuu, se i tau faamatua laitiiti le taavale ina ia mafai ona maua mai ai ni pikiapu ma ni tamai loli e fai ai a tatou faatoaga e pei o le talanoa atu lena i lau Afioga i le Minisita foi po o le a se finagalo o i ai.

Ia ona oo mai lea o le faafetai i le Minisita mo Galuega, Felauaiga ma Atinae Eeseese, le Minisita Lagolago foi ma le Ofisa Sili o Pulega ma le Matagaluega, e tele galuega faatino ua faatino foi e lau Matagaluega e tauaala mai i le Pulega o le Suavai ma le Pulega o le Felauaiga i le Laueleele faapea foi le Pulega o le Malosiaga Tau Eletise i nei mau faamanuiaga tau atinae ua faatino i si o matou itumalo. E lagona lava le faafetai e matauina lava le tulaga faasoasoa alofa i le Malo e auala atu i lau Afioga, ua maua ai foi nei faamanuiaga.

O le tulaga e avatu ai pea le faafetai i le tatou vaipamu taumafa magalo la e ua mautu, faapea foi le fausia ma le faatino o le auala i Fagasa, ae toe tatalo atu ma faamanatu atu i lau Afioga e i ai lava nai auala ia e i Papa ma Sataua pei foi sa talosaga atu ai muamua, e aofia ai la ma le auala lea e i ai le tatou vaipamu taumafa lea e i Sataua, ona o lea lava e matauina o lea e i ai le fuafuaga foi lea a le Pulega o le Suavai i le taumafaiga lea o le tanevai tumau foi lele po o le faatanoa lea e i uta i le mea o lo o i ai le pamu e faasoasoa mai ai le tatou suavai. E i ai foi ma le fuafuaga lena ina ia mafai foi ona faasoa le tatou suavai i nai aiga ia e mamao i uta ona e mamao ese ma le alatele o le tatou Malo.

O le isi tulaga lau Afioga, e tumau pea le faafetai i nai moli auala foi lea e faatino mo lo matou itumalo, ae toe talosaga atu mo nisi moli auala, o la e lava e i ai si a matou talosaga foi sa feiloai ai foi pei foi ona vaaia le galuega i Savaii, leaga e manaomia tele lea auunaga. O le tele o nai nuu ia, e le afaina le alatele foi lea, ae o nai tamai aai foi nei o nai nuu e manaomia tele lea fesoasoani ona o nai fegasoloaiga i le po.

Ia ona faapea lea lau Afioga i le Fofoga Fetalai, e momoli atu le faamalo ona o le galuega maeaea a lau Afioga i le Minisita o Tupe, le Lagolago, le Ofisa Sili o Pulega ma le Matagaluega, ae faaleo atu foi se faafetai i Matagaluega ma le Faalapotopotoga taitasi. Le galuega a le Matagaluega o Tiute ma Tupe Maua ma e uma na galulue ma faatinoina manaoga manaomia o lenei Tala Faatatau Autu o le Tupe 2020/2021. Lau Afioga e matauina ona o aafiaga lava o le faamai ma tulaga pagatia ua aafia ai le atunuu ma lona tamaoaiga. O lenei Tala Faatatau Autu o le Tupe ua faailoa mai ai ma le vaega lua o le faamama avega a le Malo. Ma e faafetaia lava le finagalo o fesoasoani a le Malo ma ana paaga mo le aufaipisinisi foi, le aufaigaluega ma le lautele o si o tatou atunuu. Ae lua lava nai vaega laiti ia na ona fai atu

ai se manatu, o isi foi tulaga ia ua saunoa foi i ai nisi o sui usufono. Ae pei o le polokalame a lea i le tulaga lea i le taumafaiga o le koko ma niu ma talo, lea e faatinoaina e le Matagaluega o Faatoaga. O lea e pei e faailoa mai ai le i ai lea o le avanoa e faatoaina ai le fanua i ni tulaga faapaaga ma le Malo. Faamolemole...

SUI FOFOGA FETALAI: E faamanatu atu i le sui usufono mamalu ua toe 2 ou minute.

Afioga TAPULESATELE MAUTENI TAMASONE METULI II ESERA: Faafetai atu i lau Afioga i le Fofoga Fetalai...

Tofa Lealailepule Rimoni Aiafi: Lau Afioga ou te tulai atu e faatu se lafo, *E faaopoopo se 5 minute o le sui usufono faamolemole lava.*

Faaluaaina e le sui usufono mo Salega Sisifo.

Na tuuina atu le maliega autasi a le Maota i le lafo.

SUI FOFOGA FETALAI: Saunoa le sui usufono.

Afioga TAPULESATELE MAUTENI TAMASONE METULI II ESERA: Faafetai i lau Afioga i le Fofoga Fetalai, faafetai i lau Afioga faapea foi Toomata, faafetai mo le 15 minute ua tuuina mai. O le tulaga lea lau Afioga, afai foi lea e i ai se tulaga faapea foi lea pau lava se i silasila ane i ai foi lea i le tau o lisi. Ia, pe afai o ni fanua lisi a le Malo, ae po o fea foi o i ai nei fanua, aua o lenei vaitaimi ua utiuti lava le faasoa, ae i ai lava le manatu foi lea ma le agaga fia galulue ia i tatou. A o tulaga foi ia afai foi e na o le faapaaga foi lele ae leai ni... e manaia, ae afai o ni lisi, ia o le tatalo lena, ia talafeagai ma le tulaga o lo o i ai tatou. E tele lava le naunau e faatino nai mea ia, o le popo ma le niu ma le talo ae i ai foi le manatu foi lele aua o nei faatoaga, i le tulaga lea i faatoaga nei e tolu, se i vagana lava le talo, ae le faapea e lava nei mea i se eka po o se 2 eka. E pei o le mea lena o lea e tau avatu ai se manatu e silasila pea la i tulaga ia pe afai o ni tulaga faalisi e fesoasoani ai i le taumafaiga o nai faatoaga.

O le isi tulaga lau Afioga, o le tulaga foi lea i le polokalame mo le toe aoaoina o tagata foi ia e galulue i auaunaga faa-turisi, ae ona ua leai ni galuega ona o le faamai. Ae se i silasila ane, pe le tatau foi ona ave lea avanoa mo isi foi tagata o fia maua lea tomai, aua e le faapea na o le vaega lea e faigaluega i le au turisi, o la e foi e i ai nai isi tagata la e fia maua foi le fesoasoani faapea. O la e ta te tilotilo foi e 2 ea pe 4 vaiaso e faatino ai lea aoaoga, ae se i silasila ane la i le tulaga lea.

SUI FOFOGA FETALAI: Malie le sui usufono toe 1 lou minute ona faamaea mai lea o lau lauga faamolemole.

Afioga TAPULESATELE MAUTENI TAMASONE METULI II ESERA: Faafetai i lau Afioga i le Fofoga Fetalai. E mafai ona faapea atu se faamatalaga i le tulaga o lenei Tala o le Tupe, i le faalogologo lava ma le faitau foi i ai, ua manino lava le finagalo o le Afioga i le Minisita o Tupe i le tulaga lea o le faaitiitia i le 5% o le tupe maua a le Malo mo lenei tausaga faaletupe ona o le tuuitiitia o lafoga a le Malo ona o le aafiaga i tulaga tau feaatauaiga talu ai lenei foi faamai. Ae ua molimauina foi e le Afioga i le Minisita isi tulaga e tuumamaina ai nei popolega e pei o le siitia lea i le 9% o tupe faameaalofa mai a tatou paaga masani talu ai lava le aafiaga i lenei faamai. E matauina lava le fia fesoasoani mai o nai a tatou paaga i le tau atinaeina o...

SUI FOFOGA FETALAI: Malie le sui usufono e faamaea mai loa le saunoaga ua maea lou taimi.

Afioga TAPULESATELE MAUTENI TAMASONE METULI II ESERA: Ia o si mea mulimuli lea lau Afioga i le Fofoga Fetalai, o le tulaga lea i le oototoga foi lea o vaegatupe ia a Matagaluega i lenei Tala Faatatau Autu o le Tupe lea e i ai galuega foi ia o lo o fuafuaina. O le tulaga la i le Matagaluega lea o Faatoaga ma Faigafaiva i le polokalame lea a le SAFFRON lea e faatupeina e le Faletupe o le Lalolagi ma le IFAD. Se i tagai ane faamolemole i agavaa mo le lautele o tatou tagata ina ia mafai ona maua ia foi faamanuiaga. O le isi tulaga...

SUI FOFOGA FETALAI: Malie le sui usufono faamaea mai loa lau lauga, a o lea ua faafofoga atu le Minisita i le tulaga lena. Malie le sui usufono mamalu.

Afioga TAPULESATELE MAUTENI TAMASONE METULI II ESERA: Toe tasi lava. O le isi tulaga o le galuega o lo o fuafuaina...

SUI FOFOGA FETALAI: O lea ua avatu le faaiuga, malie le sui usufono mamalu faamaea mai lau lauga.

Afioga TAPULESATELE MAUTENI TAMASONE METULI II ESERA: O lea ua uma atu lau Afioga. O lea ua i ai le tulaga foi lea lea ua avea ai le Komisi o... o le mea mulimuli lea lau Afioga, le Komisi o Tagata Faigaluega a le Malo na te faatinoina le vaavaaia ma le iloiloga o sikolasipi ia lea e faatupe mai i le vaegatupe lea e \$27.6 miliona mai Ausetalia, Iapani ma Niu Sila.

SUI FOFOGA FETALAI: Malie le sui usufono e i ai a tatou Tulafono Tumau e faatonutonu ai le galuega a le Maota. O lea ua ou talosaga atu, oo loa i lou itumalo. Faamaea mai loa ua oo i le taimi o le taumafataga o le afiafi.

Afioga TAPULESATELE MAUTENI TAMASONE METULI II ESERA: Ia tautuana lava le iloiloga o nei avanoa faasikolasipi, ia i ai ma tatou matata. Leaga o le tulaga lena e manaomia tele i le taumafaiga o tatou atinae tetele.

SUI FOFOGA FETALAI: E lelei ona ou faamanatu atu i le sui usufono, e i ai foi ou avanoa i mea taitasi e toe saunoa ai i mea na e totoe. Ae lelei lou usitai mai i le laulau ma le Nofoa, ona sologa manuia lea o le tatou Fonotaga i lenei afiafi. Faamaea mai lau lauga.

Afioga TAPULESATELE MAUTENI TAMASONE METULI II ESERA: Se e faigata le ta feupuai au ia, o au ia o le sui usufono a o lau Afioga o le Fofoga Fetalai.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malilegaoui: Lau Afioga i le Fofoga Fetalai, masalo o le isi lea Tulafono e le o malamalama i ai sui usufono. A saunoa lau Afioga alala mai i lalo.

SUI FOFOGA FETALAI: Ona o le ava lava ma le migao i le faafofoga mai a le atunuu, ae lelei ona ou faamanatu atu i sui mamalu. E fai foi o lo outou naunau a o le galuega a le Nofoa. E le mafai ona tuufauina, tatou te o lava i le taimi ua uma ona faatulagaina i lalo o le Tulafono Tumau o le Maota. O le mea la lea na ona ou fautua atu faapena, o le a se vaivaiga o le laulau ma le Nofoa, malilie sui mamalu ia outou utagia, e fai foi o lena a o lenei. A i ai sau faamatalaga e te fia oo i lou itumalo, e ava lava ma le migao i tulaga i le faafofoga mai a lou itumalo. Ae ua tataua ona tatou malolo mo le tatou malologa masani. Se i tulai mai le sui mamalu.

Afioga TAPULESATELE MAUTENI TAMASONE METULI II ESERA: Lau Afioga I le Fofoga Fetalai, E leai ta te le feupuai faapea i ia tulaga, o lea ua ou, e pei ona fai atu le faamatalaga, e pule lava le itu lena e te afio mai ai, ae faafetai lava i le tulaga lea o le tima limamatua. O lena lava e, o lou finagalo foi e pei faaalua mai, o lena e matau atu o lena e maua le tofa. E le o faapaole foi se manatu e faaali atu, e leai o uiga lava ia o tama, e faapea lava. E taaalo foi ma tausua, ae i ai lava le taimi e faataua ai tiute foi ua ia tatou. Ae o le a faauma atu le faamatalaga. E lagolagoina e lenei sui

usufono le Tala o le tupe 2020/2021. E faapea foi le Tala Faatatau o le tupe Nu 3 2019/2020. Ma e toe momoli atu le faamalo i galuega maeaea i Minisita Matagaluega o tupe, i e uma foi na lagolago i le taumafaiga o lenei Tala faatatau autu o le tupe. Manuia tele le Fonousu a le Palemene o Samoa.

SUI FOFOGA FETALAI: E momoli atu le faamalo ma le faafetai, malo tapena i le sui mamalu o Vaisigano Nu 2. O lena ua faafofoga mai le atunuu ma le itumalo, o le agaga lena. O le tatou va fealoaloai ia tu maualuga i le Maota lenei. E ui i lea, malo faafetai mo le tapenaga. Ua taunuu mai i le taimi o le tatou malologa masani. Ou te faasilasila atu ma le faaaloalo i le paia o le Maota, o lo o tapena pea le tatou taumafataga i le Maota o Tofilau i le isi ituala ona o le agaga ia malutauai pea le mamalu o le Palemene, faapea foi Ofisa sili o Pulega ma le faaaloalo. Ou te faasilasila atu ua faataatiaese galuega a le Palemene mo lana malologa masani e 15 minute.

Na faataatiaese Taualumaga a le Fono Aoa mo lana malologa masani i le itula e 8:18 ma toe faaaauau i le itula e 9:10 i le po.

Na toe faaaauau Felafolafoaiga i luga o le faitauga o le Tulafono Tau Faaofi o le Faatatauina o Tupe Faaopopo (Nu 3) 2019/2020 & Tulafono Tau Faaofi o le Faatatauina o Tupe 2020/2021.

SUI FOFOGA FETALAI: Ou te faasilasila atu ua toe amatalia nei Taualumaga a le Fono Aoa Faitulafono, e i ai le talitonuga o lea ua sao i alo le taumafataga a le Maota i lenei afiafi, ua maua foi so tatou malosi, mai le Alii e faaaauau ai a tatou galuega o totoe i lenei afiafi. E faataatiaese Taualumaga o le Fono Aoa, ua maea ona saunoa le sui usufono o le itumalo o Vaisigano Nu 2. Ia, faaaauau le tatou galuega, o le avanoa lelei foi lenei mo se isi sui usufono e fia saunoa. Tulai mai le sui mamalu mai Falealili i Sisifo.

Tofa AUMUA ISAIA LAMEKO (Falealili Sisifo): Faafetai i lau Afioga i le Fofoga Fetalai mo le avanoa i lenei aso. O lele ua maea le taligasua, ua maua foi siga faasiligamalosi. Faatalofa atu i lea itu, o le mamalu o lau Afioga i le Palemia, mamalu o le Kapeneta faapea foi le Minisita lagolago. Faapea foi i le matou itu nei, susuga i Taitaifono a Komiti faa-Palemene. E le gata i lea, o sui usufono o le Palemene a Samoa. E faatalofa atu foi i le paia o auauna a le Atua, i so o se fata faitaulaga i Samoa. O lo o faafalelemalu i lea afioaga ma lea afioaga, i le sasaina o le ipuvai o le ola. Faatalofa atu foi i pulega a alii ma faipule, komiti tumama, tina, saoa ma tamaitai, o le

malosi o le nuu faapea fanau aoga, ma se aupito i itititi i so o se afioaga i Samoa. O lenei aso, o le aso o a matou lauga e faatatau i le Tala Faatatau Autu o le tupe 2020/2021 ma le tala faaopoopo Nu 3 o le tupe 2019/2020.

E faatalofa atu foi i le mamalu o le au faipisinisi tumaoti i so o se vaega o Samoa. Ofisa sili o Pulega a Matagaluega ma Faalapotopotoga a le Malo, o e aufaigaluega o so o se matata. Le mamalu o le au faifaatoaga, faigafaiva, ae le gata i lea o i latou o lo o galueaina le vao, malo le tauatai i lenei itula o le po. Faafetai i le Atua ona o lana tausiga i si o tatou atunuu a o feagai ai ma feagai ai ma faamai o le Koviti-19. E talitonu le manatu e le faigofie e le taugofie.

A o le i faaalua se manatu lau afioga i le Fofoga Fetalai, na ona fia oo lava i si o matou itumalo o Falealili. Le paia ia Alalagafa ma le nofoa tulafale ma le tauagaeseese ia Falealili, alo maia se i faia so tatou manatu aua le Tala o le tupe i lenei tausaga, ma le atinaega o lo tatou Malo. E manatu foi o le a amata se faamatalaga i le Minisita o Faatoaga. E muamua ona momoli lau faamalo ma le faafetai, i lau afioga i le Minisita, aemaise Minisita lagolago o le Ofisa sili o le Pulega ma le aufaigaluega o le Matagaluega o Faatoaga ma Faigafaiva. Ona o nei le tulaga, silasila foi, o lea ua faasafua le tatou poloketi o le totoina o le koko. O le toe faaolaina o le koko i totonu o si o tatou atunuu. O lea foi ua maea ona tufatufa mai a tatou koko. E pau lava le vaega lea e misi ia tatou koko, o le vaega lea o le ponesi po o le stimulus package, ina ia uunaia pea tagata e toto le koko. E le gata i lea o le tatou niu, e faapena ona faasoasoa mai le totoina o le niu.

Lau Afioga i le Fofoga Fetalai, o le isi vaega lea e fia fai ai se manatu e faatatau i pole fagota. E matauina lava, i le Fonotaga ua tuanai, sa ou lauga e faatatau i le pole fagota lea sa tatau ona tu i gatai o Poutasi. Aua e tasi lea afioaga o le itumalo o Falealili o lo o tele lava ia vaa fagota alia. O lea la sa tatalo atu ai i lenei vaiatau mo se pole fagota. E pau lava le pole fagota lea e tau latalata mai i le itumalo lenei o Falealili, o le pole fagota lea o lo o tu i gatai i Siumu. O lea e toe tatalo atu ai i lau Afioga i le Minisita se i toe silasila ifo i le vaega lea. E avatu foi le faamalo ma le faafetai, i latou o lo o taumafaia le maketiina o a tatou talo tuuaisea, o talo ia tuuaisea valu i Ausetalia, maketiina o talo mata i Amerika. E le gata i lea o tatou ia, o lo o auina atu mo le maketi i Amerika. E talu ai nei lava sa tufatufaina ai a tatou tiapula, faatauina mai i nisi o le mamalu o le au faifaatoaga, sa lavea ai foi lenei itumalo i tiapula na faatau mai. Ou te tatalo atu i se vaega o le \$4 miliona lea ua faamatuu mai lalo o le paketi a le Malo, se i fai faalelei ai le auala lea i le.... se tasi o faatoaga tele i Matautu Falealili. Atonu o i lea e le o....o le aofaiga o le tiapula lea e lau mai i i le tatou Malo e 30,000 i le vaiaso lea na tea nei. E tatalo atu ai, o a fa au i lau Afioga i le Minisita, faaoga se vaega tupe e faaleleia le auala, aua le lauina mai o tatou talo ia mo tatou maketi. O le isi vaega lau Afioga i le Minisita o le tulaga i le polokalame lea i le faaitiitia o le manu ainiu.

E momoli atu le agaga faafetai, o lea sa fai le...

SUI FOFOGA FETALAI: Malie le sui usufono o saunoa se i tuu atu le avanoa e saunoa ai le Minisita o Faatoaga ma Faigafaiva.

Tofa Hon Lopaoo Natanielu Mua: E na ona ou faamanatu atu lava i le sui mamalu, o le tatou auala lea e nafa ma le Afioga i le Minisita o Galuega. E moni lava o lo o i ai nai selei faapena, ae o le faasoa lava le sau i i, i le afioga i le Minisita o tupe ae le tatau ona matou toe fesuiaia faapena. Ae tuusao pea le talosaga i le afioga i le Minisita e ana le Matagaluega, lau Afioga i le sui mamalu.

SUI FOFOGA FETALAI: Faafetai o lea ua faafofoga atu le sui mamalu. Tulai mai le sui mamalu e faaauau lau saunoaga.

Tofa AUMUA ISAIA LAMEKO: Faafetai mo le avanoa, o lau talosaga atu lena, aua e oo mai i le aso, a talanoa atu foi i le Minisita o Galuega, ae toe tuu atu foi le isi tuualalo ua ova ma le tausaga.

I le polokalame o le faaitiitia o le manu ainiu, e momoli lau faamalo ma le faafetai i le Malo i le momoli atu o iliafi. Ua faaaogaina e nuu ma afioaga o si ou itumalo, ina ia taumafai e faaitiitia manu ainiu. E tatalo atu ai pe toe maua nisi iliafi, fua i luga o le aofaiga o polokalame o lo o faatino e alii ma faipule. O le isi vaega lau afioga i le Minisita. Ona o lea o lo o matauina o lo o i ai se tasi o pusaaisa i le tatou, e maua ai le aisa o lo o faatuina i Siumu. E fai sina maomao ma matou i Falealili i Poutasi ma Siumu, pe leai se isi fuafuaga mo le faatuina o se aisa le tumau i Poutasi, aua a matou vaa fagota o lo o faaaogaina. E le gata i lea sa ou talosagaina pe maua se fesoasoani i le mea lea o le uafu opeopea po o le floating wharf. O le aoga o le vaega lea, e taula ai vaa fagota nei alia, ma faapena ona faaee atu ai, ma le tau o mai i Apia ua fai sina mamao ma le tulaga i penisini. E momoli atu le faafetai tele e tusa ai ma le polokalame o le fai. Na taua e nisi o sui usufono le fai isaraelu, ia o lou lava talitonuga e fai foi sina taugata o sia atinae ae taumafai lava i ai i le mamalu o le atunuu ina ia faatino. A fai fai ae le taunuu, ona toe foi lava lea i le tatou fai palagi tuai lea o lo o i ai e toe faafailele aua le fofoga taumafa o le atunuu.

Oo mai i le Matagaluega o Pisinisi Alamanuia ma Leipa, e momoli lau faafetai tele i le Afioga i le Minisita, i le Ofisa sili o Pulega ma le Matagaluega. E muamua ona momoli le faafetai i le faafaigaluegaina o tagata faavaitaimi. O le aoga o le polokalame lenei e i ai le atamai ma agavaa i galuega faavaitaimi, e pei o faatoaga, tulaga i fasimanu faufale ma le kamuta. I le vaega lea o le faufale ma kamuta, o lea e i ai le tatou polokalame lea o le aperenetisi. E tasi lea o polokalame sa faapena ona soosoo tauau ai le Matagaluega o Leipa i aso la ma le Malo o Iapani. Aua e tasi lea malo sa

ave le faataua ina ua maea le taua lona 2 o le lalolagi, ina ia faamalosia a latou trades po o aperenetisi. E momoli atu ai le agaga faafetai i le faaauauina o nei polokalame.

E momoli lau faafetai i le afioga ia Toosavili, le afioga ia Tuatagaloa ma le matua ia Alaimoana e tusa ma le faatuina pea ma le faaauauina o lenei polokalame. E fesoasoani i lo tatou Malo aua le auina atu o fanau mo galuega i atunuu mamao. Ua tele le aoga, ua fai ai atinae i aiga ma nuu, ae le gata i lea o si o tatou atunuu. O le isi foi mea e lelei ai le tatou polokalame lea, o lo o faapena ona i ai le substitution lea i le faafagaluegaina o tagata. E momoli atu ai le agaga o le faafetai.

O le talosaga i le polokalame lea o fefaatauaiga talafeagai, e matauina nei ina ua, o le tatou poloaiga o le Koviti, o lea ua toe faatuina ma toe faaooina le tatou Komiti faatino oloa. Ou te iloa o se tasi lea o Komiti e pitosili ona taua, i lou talitonuga. Aua e ui lava ina i ai le Tulafono o le Consumer and Competition lea o lo o fai faatauvaga ai le tau o oloa, peitai o nisi o i latou o faioloa, e le gata ua taugata a latou oloa, ae leai se fua faatatau o fai ai le maualuga o le tau o oloa. Ua aoga la le tatou poloaiga ua toe faatu ai le tatou Komiti lea o tau o oloa. Ma e talosagaina le Malo i le lumanai, ina ia faia se Tulafono e toe faaae ai le Komiti o tau o Oloa. O le tulafono o le sootaga va o Leipa ma galuega, po o le a se fuafuaga a lau Afioga i le Minisita ma le Matagaluega, e le gata i lea, o le komisi o galuega a le Malo. O Tulafono o tagata faigaluega 2004 ma le Tulafono lenei i le sootaga o le va o le Leipa ma galuega 2013. E i ai vaega taua o lo o i totonu o Tulafono ia, e faatatau lava i le penefiti e maua e le tina maitaga. O le faataitaiga o le Tulafono o Leipa ma galuega i le 2013, ua i ai aiaiga, a faapea e te agavaa i le maitaga lea o tina po o le livi, e te faigaluega muamua mo le 12 masina faatoa e agavaa i ai. A o le Tulafono o Tagata faigaluega 2004, e te faigaluega nei e te maitaga taeao e te agavaa i le 12 vaiaso sa i ai, o le taimi nei ua 14 vaiaso full pay, a o le tatou vaega lea e i tua le vaega tumaoti, o le fua aupito maualalo o lo o i ai, e 4 vaiaso e full pay, 2 vaiaso e leave without pay po o le 6 vaiaso tool with pay. E tau lava ina ou talanoa atu i tulaga ia, faasao ai tupe a lo tatou Malo, ia fausia se Tulafono se tasi e vaavaai uma ai tulaga i public sector, ma le private sector i le lumanai. O lau tuualalo lena i le afioga i le Minisita.

SUI FOFOGA FETALAI: Malie le sui usufono o saunao, se i tulai mai le Afioga i le Minisita, e fitoitonu ma mataupu ia.

Afioga Hon Lautafi Fio Selafi Purcell (Minisita mo Pisinisi, Alamanuia ma Leipa): Faafetai mo le sui mamalu, mo manatu e lelei ua faaalua. O le Tulafono lea o le Labour Relations po o le L.E.R.A, o le taimi nei o la o lo o faagasolo le review, e silasila uma i tulaga uma ia sa e laulauina mai. Atonu a maea le review, ua tuu i ai le konesale o lo faafaigaluegaina i le taimi lenei,

ona maua mai ai lea o se Tulafono e address ai isi issues ia e te laulauina mai ma lou faaaloalo.

SUI FOFOGA FETALAI: Faafetai. Tulai mai le sui mamalu mai Falealili i Sisifo e faaauau le saunoaga.

Tofa AUMUA ISAIA LAMEKO: Faafetai i lau Afioga i le Minisita mo le tali i lenei mataupu. Ona oo mai lea o sau faamatalaga i le fesoasoani lea o lo o ave i le SBEC, le tatou Business Hub. E i ai lou talitonuga e manaia le model lea o lo o faaaogaina nei e le faletupe o Atinae, o le model lenei e faapea lona faiga. O le phase muamua, e \$2,500, o lona phase lona 2, e \$5,000, a o le phase lona 3 e \$7,500. A tuu faatasi i totonu o le 10 tausaga, e \$15,000 e alu le tagata e nono mai i le faletupe o atinae, ae aoga la tatou vaega lea o le SBEC, aua o le tele o tagata nei, e leai ni a latou aseta e faaoga e secure ai a latou nonogatupe. E talosaga i ai e faaoga le model lea o lo o ua faaoga lea ua pilot nei i le faletupe o atinae i Savaii. I le mea sa faaoga ai tagata, e guarantee e le SBEC po o le tatou Business Hub lea ua sui i ai le igoa. O le 80% ae saili mai e le tagata le 20% o lana nonogatupe lea i totonu o le 10 tausaga.

O le Matagaluega o Fesootaiga ma faamatalaga tekonolosi. Lau Afioga i le Minisita, lau Afioga i le Minisita lagolago, le Ofisa Sili o Pulega ma le aufaigluega. E tasi lea mataupu sa, ou te iloa ua tele tausaga ua tuanai o ou talanoa atu i ai. E momoli lau faafetai tele i lau Afioga i le Minisita ma le kamupani telefoni o le Digicel. Ona o le aso ananafi, na faamautinoa ai o le a faatu le pou i Satalo i Falealili, ina ia mafai ona foia le faafitauli lea, e pei ona ou talanoa atu ai i tausaga ua tuanai. A e alu atu i inei i Samoa i Dubai i Fonotaga a le Malo e faaoga le sim card a le Digicel e ola. A e alu atu nei i Apia e te alu i Falealili i sisifo e le ola. Ou te talitonu, ua aoga le tuitui atu ma mea ua fai ai lea atinae, ina ia faapena ona oo le auaunaga i tagata lautele.

O le Matagaluega o Aoga Taaloga ma Aganuu, lau Afioga i le Minisita ma le Minisita lagolago, o le Ofisa Sili o pulega ma le aufaigaluega, faamalo faafetai. Faafetai mo tatou polokalame ia o lo o faia i luga o le TV, ua leva ona tataua ona fai le tatou polokalame lenei. Aua o lea ua aoga le poloaiga ma mea ua faatino ai le polokalame, aua o lea lava sa faaoga le tatou leitio 2AP, e fai ai a tatou polokalame. Ae ua manaia lenei vaitau o lea ua faaoga ai le tatou TV, e fai ai a tatou aoga. E pau lava si vaega o le talosaga, le tupe lea o le one government grant. O lea e tuuina atu i aoga taitasi, aua le faaleleia o mea tau faleaoga, pe le mafai ona i ai se fetuunaiga laititi. Ina ia mafai ona faatau TV ia e faaoga i totonu o potuaoga, aua a tatou polokalame, mo aoga tulagalua, ae le gata i lea o tatou aoga maualuluga, o le talosaga lea i lau Afioga i le Minisita.

Afioga Hon Loau Sola Keneti Sio (Minisita mo Aoga, Taaloga ma Aganuu): Faasaoina le taimi o le sui usufono

SUI FOFOGA FETALAI: Malie le sui usufono o saunoa o Falealii, se i tuu atu le avanoa lea i le...

Afioga Hon Loau Sola Keneti Sio: O la e mafai ona faatau.

SUI FOFOGA FETALAI: O lena ua faafofoga atu i le saunoga a le Minisita.

Tofa AUMUA ISAIA LAMEKO: Faafetai i lau Afioga i le Fofoga Fetalai mo le avanoa, faafetai foi i lau Afioga i le Minisita, e leai o le tulaga lea na ou taua ai le one government grant ina ia tatala avanoa e faatau ai TV. Aua a alu atu i gauta i le tou Matagaluega, e le o lavea i lalo o criteria e faatau ai se aseta faapea mo a tatou faleaoga mo le polokalame lea ua faagasolo nei. Ae na ona tatalo atu, se i tau tatala laititi ia criteria o le tatou grant lea ia faapena ona faatau ai TV mo le faaaogaina i totonu o tatou aoga.

O le Matagaluega o le Soifua Maloloina, e avatu lau faafetai ma lau faamalo i le Afioga i le Minisita, e tusa ai foi ma auina atu o le fomai tumau mo le falemai i Poutasi. Ua savali nei i le 3 masina ua oo atu ai le fomai, ma ua tele le aoga mo....e le gata mo le matou itumalo i Falealili, faapea foi le itumalo i Siumu Safata faapea foi Lepa ma Lotofaga ma Aleipata.

E momoli foi lau faafetai i le kamupani fai auala, na o latou faia le faasimaina o le auala e alu i totonu o le falemai. Aua e pei ona taua, sa faaleagaina lava le afe i totonu o le falemai, ina ua tae le ta sa i ai. Ae momoli atu ai le agaga faafetai i lau Afioga i le Minisita o Felauaiga i le lauelele, faapea foi le au faigaluega, e tusa ai ma le faatinoina o lenei atinae. O lea ua maea ona faasima ma lelei, o lea ua le toe pagatia ai foi le mamalu o le atunuu ia latou taavale.

Le Matagaluega o Punaoa Faale-natura le Afioga i le sao faapito, ia e momoli atu le agaga faafetai, faafetai mo galuega lelei, o lo o faatinoina e le Matagaluega. O le galuega i Togitogina mo le faamamaina o tatou togalaau o lo o i ai, e momoli atu le agaga o le faafetai. E pau lava si talosaga e manaomia se polokalame i le pulea gafataulimaina o eleele apovai, i gauta o Saleilua, ma le nuu i Sapunaoa, aua o pitonuu ia o la e i ai faatanoavai a le pulega o le suavai. E manaomia la se polokalame mo le apoina o suavai i ia afioaga e 2.

O le Matagaluega o Leoleo ma auaunaga tau falepuipui ma le Ola toefuataina. E momoli atu lau faafetai i lau Afioga i le Minisita e tusa ai foi ma galuega lelei, ua tuufaatasia ai le Matagaluega. E pau le vaega ou te tatalo atu ai, se i toe tagatagai lava i le totogi amta o leoleo. Pe a fuafua i le totogi amata o i latou i le auaunaga i le falepuipui. Ua fai sina tele o le eseese o

le entry point ae a fua i le training lea e te alu ai e avea oe ma leoleo, e fai sina umi tele o vaiaso na, ae sau e laititi lou totogi na i lo le entry point o le tagata lea e faigaluega i uta i le falepuipui. Se i silasila ifo i le vaega lea.

Le Matagaluega o Tina ma Tamaitai, Atinae o Nuu ma Afioga ma Agafesootai. Lau Afioga i le Minisita e momoli atu le agaga faafetai, e tusa ai ma galuega sa faataunuina e la outou Matagaluega i afioaga ma nuu taitasi. O le talosaga e taatia atu pea i autafa o lau Afioga i le Minisita, o le polokalame lea a le tou Matagaluega ma le tatou Malo, e faatatau lea i faalupega o nuu ma afioaga. Na ona tatalo atu lava pe mafai ona tuutuu laititi i tua le tausaga e faauma ai. O le taimi lenei, ua fai lava si tele o faamasinoga a o matou nuu ma afioaga o si o matou itumalo. Mafua mai ai i le tusi faalupega ia, faapea le Matagaluega ua tatau ona faagata i le masina o Iulai i le tausaga lenei. O le tatalo atu lea i lau Afioga i le Minisita. E talosagaina foi le faaogaina o le tatou fale lomitusi. Ina ia faapena ona lolomi ai taiala lea o lo o faaogaina e alii ma faipule i fonotaga a nuu. A silasila lau Afioga i le upega tafailagi a le Matagaluega, e tasi lea o Matagaluega e i ai le latou website. O le manaia ia o le website i le tilotilo. E pau lava le mea e le o maua ai, e le o maua ai Tulafono ia e faatonutonu ai le Matagaluega. E tai pei o le Tualafono lea o Nuu 1990, e leai se kopi o le Tulafono i luga i i, e mafai e le mamalu o alii ma faipule ma i latou e mafai ona faaogaina le computer ma agavaa i ai. E oo foi le tulafono toe teuteu lea o le 2017, ma tuu ai i totonu a tatou principles ia e 3, o le good governance, accountability ma le transparency e leai foi se kopi o i luga. Na ona tatalo atu i lau Afioga i le Minisita ma le tou Matagaluega, ina ia tofia se tagata faapitoa na te... o lana galuega e fai o le tuuina o faamatalaga, e le gata i lea o le Tulafono i luga o le upega tafailagi mo le mamalu o le atunuu.

Ona ou oo mai lea o lau faasologa ma lau faafetai, i le Matagaluega e sili ona ave i ai lau faafetai, o le Matagaluega lea o Galuega Felauaiga ma Atinae eseese. Lau Afioga i le Minisita, atonu o au o se tasi o tagata ua avea ma faatiga mata i lou ofisa. Lou savalivali atu e talosaga lava ia tulaga ia tatou auala galue. O auala e alu i tai i le nuu taitasi, aua o nuu o lou itumalo e amata atu lava i Togitogiga, Saleilua, Poutasi, Vaovai, Matautu, Tafatafa, Malaemalu, Satalo ma Sapunaoa, e 8 nuu. Ae momoli lau faafetai, ua avea le talosaga mo le faia o le auala e alu i le faleaoga i Saleilua, ua faata ai se tasi o Vaega o lea auala galue. O le faleaoga o le falelua lenei, sa tu i tai i Poutasi. Ia a o lea ua sii e toeaiina i gauta ina ia faapena ona le toe aafia i matagi malolosi ma tsunami. E tatalo atu ai i lau Afioga i le Minisita e le toe oo sau faamatalaga i le tulaga lea, ona ou te talitonu ua malamalama le tulaga o au talosaga faatatau i auala e alu i tai i nuu ia taitasi, ae le gata i lea o auala galue. Talosagaina le faia o ni aoaoga mo kapeteni o vaa o alia fagota. E tusa ai ma aiaiga o Tulafono o le Maritime Labour convention o lo o i ai i le taimi nei. O le Matagaluega o Galuega, e talosagaina foi le faaoina atu o le suavai ma le eletise i gauta le auala galue ua faapena ona nofoia e tagata ua o ese

mai tai le sami, i lalo o le Vaega lea o le tatou CSO o le Community Service Obligations, lea ua faaagaga ai le tai \$4 miliona mo vaega ia e 2.

Faatai lea o so matou leo lau Afioga i le Fofoga Fetalai, ia manuia tele lenei fonotaga manuia lau Afioga i le Palemia, momoli atu le agaga faafetai e tusa ai ma galuega e tele lea sa fuafua e lo tatou Malo, o lea ua taufaaiuiu lea tausaga. E momoli foi le faafetai tele i lau Afioga i le Fofoga Fetalai, manuia foi si o matou itumalo, manuia Samoa soifua.

SUI FOFOGA FETALAI: Malo, faafetai le sui usufono o Falealili i le saunoaga. Malo tapena ua faafofoga foi Samoa i le saunoaga manino aemaise o le faafetai ma fautuaga foi o feagai ai ma le Malo. Ia o lea ua matau atu o sauni mai ia le Afioga ia Gatoloai, le sui usufono mai Faasaleleaga Nu.1.Sisifo.

Afioga Hon GATOLOAIFAANA AMATAGA ALESANA GIDLOW (Faasaleleaga Nu.1 Sisifo): Ia e faatalofa atu ma avatu le agaga faafetai i lau Afioga i le Fofoga Fetalai mo le avanoa mo le sui usufono mai Faasaleleaga Nu.1 mai Sisifo, e avatu ai foi nai motugaafa ia aua le Tala o le Tupe ua i lumamea nei.

Ia ae muamua ona ou faatalofa atu i lau Afioga i le Fofoga Fetalai, malo le onosai ma le lavapapale i lenei itula tuneva o le afiafi. Tainane le afio ai foi le Afioga i le Taitai o le Malo le Afioga i le Palemia, Sui Palemia, le afifio foi o le mamalu o le Kapeneta ia ma Tamaitai Minisita, tainane foi le afifio ai o Minisita Lagolago. Ia afio mai foi i lenei itu o le malu, o lo o afifio atu ai ia Taitaifono o Komiti a le Palemene ia ma Sui Taitaifono tainane le paia lasilasi o sui usufono mamalu o le Palemene o Samoa mai itumalo taitasi. Faapena foi ona afifio Ofisa Sili o Pulega o Matagaluega ma Faalapotopotoga Tumaoti a lo tatou Malo. Malo le galue malo le auuuna mo lo tatou atunuu. Ia lau Afioga foi i le Failautusi ia ma le tatou aufaigaluega o lo o lima ma vae i ai ia le tatou Palemene, ia faafetai lava le faatino o faiva ma tiute tauave.

Ia lau Afioga i le Fofoga Fetalai, ia e fia faatalofa atu i le faafofoga tapuai mai a Samoa, afio ai o le Afioga i Le Ao Mamalu o lo tatou Malo ma lana masiofo, tainane foi le faafofoga mai a le Sui o le Fono o Sui Tofia ma lana masiofo. Ia lau Afioga i le Faamasino Sili, ma lou faletua, avea foi lenei avanoa e molimoli atu ai moomooga molipo aua lou tulai mai ai i le tofi. Ia alofa le Atua ma faaagavaaina pea lau Afioga e tusa ai ma le amiotonu ma le faamaoni o tulaga tofi, e le faigofie le tulai mai ai i le tulaga o Faamasino i lenei lalolagi i le tele o faafitauli ma aga eseese e ono faafaigata ai le galuega. Ia ae pipii pea i le Atua ma faamoemoe i le Atua o ia e ana tofiga e faapea ona fesoasoani mai ia i tatou ma so tatou vaivai.

Ia e faatalofa atu i le afio ai o le Peresetene o le Faamasinoga o Fanua ma Suafa ia tainane foi ia alii ma tamaitai faamasino o a tatou Faamasinoga eseese.

Ia lau Afioga i le Fofoga Fetalai, ia o le a taoto ia paia o Samoa, e talitonu ua uma ona oo i ai ia saunoaga ma fetalai a le mamalu o le tatou Palemene. Ia e le taitai ona opo i se faamatalaga a le sui usufono o Faasaleleaga Nu.1. Sisifo. O paia ma sa ia, ia e faanuunuu atu ia faatini o tausala. Ae e fia avatu le agaga faafetai i le aufaigaluega o lo o faapea ona punonou ma tatalo, nono manu aua se manuia o Samoa, ina ia agalelei le Atua ma fesoasoani mai pea i le faatino ai o tulaga tauave o faiva ma tiute taitasi, o Taitai ina ia manuia Samoa ma ona atinae ma le ola alualu i luma.

Ia ou te fia faatalofa atu i le faafogafoga mai a si ou itumalo, ia i lou itumalo ia Iva ma ona atatala ia Salelavalu ma Lalomalava. E malo lava faafetai tapuai mai. E talitonu e le ae manuia ni faiva pe a na leai ia la outou tapuaiga. Ma e momoli atu ai le faafetai tele i le afifio ai o tupu ma ee, aiga ma tapaaui, ia ae tainane foi le alalatai o le aufueloloo, tootoouli o lo tatou itumalo, aemaise foi ia faufautua a faletua ma tausii, tupulaga lalovaoa, ia ma le aufaigaluega tofofi a le Atua, o lo o faapea ona faafalelemalu i totonu o lo tatou itumalo, ia aua lava ia le soifua faaleagaga o lo tatou itumalo. Faamalo lava le tapuai mai.

Ia se i fai se manatu, ia aua lava le tulai atu e fai ma sui usufono o lo tatou itumalo, i lenei foi Paeaiga, e le gata i lena o le Tala o Tupe o lo o opea nei i Maota ia mo le 2020/2021, ia ma le Tala Faaopoopo 2019/2020.

Lau Afioga i le Fofoga Fetalai, e talitonu lava le manatu, e le mafai ona alu ese le sui usufono o Faasaleleaga Nu.1. Sisifo mai i le Tala o le Tupe lenei. Aua foi la lea o le uso a sui usufono o Faasaleleaga Nu.1. Sasae, o lo o ia faafoeina ma faatautaia ia lenei Tala o le Tupe, ua matuai taatia i lona atoatoaga, ma e talia ma le atoatoa e lenei sui usufono ma lenei itumalo. Malo le fai o le faiva lau Afioga Sili, ae tainane foi le galulue ai o le Afioga i le Alii o lo o lagolago ia te oe Ofisa Sili o Pulega ma le Matagaluega atoa.

Faamalo foi i Matagaluega uma o lo o latou fesoasoani i le aoao mai o tupe ia aua le taumafai e lufilufi ma faasoasoa i manaoga o Samoa uma lava aemaise lenei vaiata, ua faigata lava ia lo tatou tamaoaiga po o ua afaina lava ona o tulaga o faamai. Faafetai i le Atua, masalo pe na o lo tatou tamaoaiga lava o afaina ae e le o afaina ia soifua o le paia ma le mamalu o tagatanuu o Samoa uma. O le agaga faafetai lena ma le lagolago i le tatou Tala i le Tupe i lenei foi tausaga i le 2020/2021.

Ia ae na o nai tuualalo, ia ae muamua ia le agaga faafetai, e muamua lava lau faafetai i le Afioga i le Palemia, ia ma le Kapeneta. Faafetai foi i le Komiti o lo o latou faatautaia ia fuafuaga foi ia aua le saogalemu ma le puipuia o Samoa mai le faamai o le Koviti-19.

E le faigofie foi le tali mai i manaoga o lo tatou atunuu ua mananao foi ina ia matuai tatala ina ia tatou o i le mea e masani ai. Ia ae o la outou taofi ma

Ia outou silasila totoa, lea o lo o faasaoina ai pea Samoa. Aua ua o tatou maua tala, i nisi o atunuu ua o latou tatala ia fuafuaga sa i ai i o latou Malo, ia o lea ua o tatou mautinoa ma o tatou faalogoina, ua toe amata ona sasao ia le faamai, atunuu tetele, Amerika, Initia. Ia o lea foi ua o tatou faalogologo atu ai i si o tatou uso atunuu lea e latalata mai o Niu Sila, ia ua faapena foi ona toe tau afaina, ia ona o le naunau lava ina ia toe foi ia le soifuaga i le mea e masani ai, ae o lo o faamalumalu mai pea ia le Koviti-19 e le i alu mamao. O le mea la lea, e malo lava ia le taofiofi pea. Ma e ou te auai pea i le tulaga lea, e tatala pea nai mea i totonu o lo tatou atunuu, ia ae o le failalaga lea mai fafo, ia ou te matuai lagolagoina lava ia le taofiofi pea se i oo lava i se vaitaimi e silafia lelei e lau Afioga ma le mamalu o le Kapeneta aemaise o Komiti Faafae ia ua alagataua ona tatou oo i ia tulaga.

Ia ou te faafetai foi i lau Afioga i le Palemia, aemaise foi le Minisita o Galuega ma le tatou Kapeneta. Ou te faafetai mai le motu o Salafai, aua o lea ua maea, ua matagofie ia lo matou auala laupapa lea i Maliolio. Sa matou failalaga ai, faafetai tele lava ua faigofie ia faigamalaga a Savaii. Pe a ma le vaiaso talu ai tetele o timuga, sa i ai foi tulaga ua papa foi ia vaitafe ma tulaga faapena, e leai ma se afaina o Maliolio. E leai ma se taofiga o feuaiga mai le Itu Asau i Faasaleleaga, ioe Faasaleleaga atu foi i tua i Asau.

O le mea lea e momoli atu ai le faafetai tele ua faatino lea galuega lelei mo Salafai ma e ou te lagona ai foi, ua lalata mai ai foi se taimi e faatino ai foi le isi galuega lelei foi mo Salafai le itu o Faasaleleaga, le auala laupapa lea i le va o Sapapalii ma Lalomalava, aua le alu atu lea i le falemai ma faasopolia atu i le Itu o Tane. Ia talia ia manu mo lea faamoemoe.

Ou te faafetai foi e tauala atu i le Nofoa i le Afioga i le Minisita o Galuega, ia mo le faatinoina o auala galue. Ia e moni lava e tasi lava ia se auala galue mai isi mau talosaga ia na tuuina atu, ae ua lava lava lava lea. Ia ae faapea o i ai nisi toega o totoe, ia se i tali ane i isi talosaga na ua leva ona taatitia faamolemole. A le tele foi na ona faalaulelei lava, na o le faalaulelei lava ina ia mafai ona oo nai taavale i ua i atinae e manaomia ai sa e tataua ona faatino ai ia faamoemoe.

Ia o le isi au faafetai tele i lau Afioga i le Minisita o Tupe ma la outou galuega fita, se o le siitia lea o le penisiona a le aumatutua. O lea ua uma foi ona saunoa nisi o sui usufono mamalu. Ia ae ou te tautala lava au aua o lea ua ou i ai i lea penefiti ma le matagofie e avatu ai le agaga faafetai tele lava. Faafetai i le faasoia e ui lava ina utiuti ia le faasoia ma tau lelava, ae o lea lava ua mafai ona faatino ia lea fesoasoani tele.

E talitonu foi, o lea fesoasoani, ua oo lava i totonu o aiga, aua o si penisiona lea a si tama ma tina, ia e faamoemoe i ai le aiga atoa i masina taitasi. Ua faatalitali foi lava latou e penefiti mai ai i le penisiona a si loomatua ma si toeaina, ae o lea ua mafai ona faaopoopo i ai ni nai tupe ia ma tai \$100 maimau pe ana faapea e \$100 e faaopoopo mo le isi 6 masina. Ia ae o lea ua manaia lea faafetai tele lava.

Ia o nai fautuaga ma nai tuualalo, e muamua lava, ou te avatu se talosaga i le tulaga lea o pepa penisione aemaise lava mo le motu i Salafai, ou te iloa lea ua taofi i le taimi nei ona feoai atu ai, e feoai mai ai i Upolu ma toe o atu ai i le motu. Ae e talitonu le agaga, e leai ma se tina ma se tama penisione Salafai e te i te i lava ua tietie mai i le vaa ma agai mai i Upolu. E i ai ia faamoemoega tatau o aiga, e ao ona omai ai, ia ae avatu pea se talosaga, pe le i oo foi i le taimi e talatala ai foi lea vaega e faataga ai ona faaaoga ia nai a latou cards ia e faimalaga mai ai.

I sau sailiiliga na ou taumafai ai, e pei lava na o se toavalu lava ia nai tagata penisiona i le aso. A fuafua la i malaga ia e sau, e 4 le sau 4 le alu atu, ia e toetiiti lava tasi le penisiona i le faigamalaga, e faapea ona faaaogaina ia le tatou pepa lea. A faapea e faaopoopo ona pei lava lea e tele. A tagai oe i le oototoga taitasi, ia e pei e mama ai i ina ia se talosaga ma se avega foi. Ia ma e avatu ai foi ia se talosaga foi lea e manaia aua o lea ou te lagona i le taimi lenei o lo o... masalo o totoi mai e le NPF ia femalagaiga ia a le au penisione i le Shipping. Ae po o le a se tagai i ai, pe le avega ma tulaga foi ia o le Community Service a obligation e faaali ai foi ia lo tatou amanaia o tama ma tina Samoa o auauna ma tautua mo lo tatou atunuu i auala eseese. I totonu lava o aiga, ae o le tautua lava lena o le fatuaiga, o le tausiga o nuu ma afioaga. Ia o se auala lea e faaali ai foi le amanaia lo latou tautua i le taimi foi a o malolosi i latou.

Ia ona... ma e ou te talosaga atu lava ma le agaga mauualalo, ua faalua nei ona ou faalogologo ma e foliga mai o lea ua tau faapea, e manaia le cancel loa, aveese uma pepa malaga lea a tagata matutua, aua po o Savaii po o Upolu o lea lava e i ai le avanoa lea. Aveese foi ma tulaga ia e maua fua ai ia latou vailaau. Ae tagai foi la lea, o faigamalaga ia e pei ona ou fai atu, e le o se mea e faia i o latou fiafiaga po o se latou faamaumauina o latou taimi. E fai i luga o le tausiga o aiga, le taumafai pea e faamaopoopo ia aiga pe nofo pea i Savaii ae sau pea e asiasi mai aiga iinei i Upolu. E i ai lava fuafuaga e ala ai ona femalagaai nai tina ma tama matutua.

Ia ou te lagona, o se tulaga e tatau ona vaavaai i ai, ia lelei ia mo monitoring. Ia vaavaai faalelei ia le faaaogaina o ia pepa, ina ia aua ne i soona... aua e tau maua i sou faalogo faapea e pei ua malaga ai ia le autalavou, ou te leiloa pe moi lea tala. Ae ou te lagona a faapea o se tulaga lena, ia e ao la ona tuu se faasea i le lelei o le latou monitor ina o lea tulaga, ina ia fai lava na o e e agavaa i ai, ae aua ne i sosolo fua i isi tagata e le tatau ona latou penefiti i ai.

Ia faapena foi tulaga o le vailaau. A lelei lava ona monitor ina vailaau a le aumatutua, e le soona faaalu foi ia le tulaga lea e i ai e pei o le a talavai uma ai le aiga atoa, aua o vailaau lava a tagata matutua e faapitoa lava. Ia po o le mai suka po o le toto maualuga ia vagana la panadol na ta te faalogo ai. O isi taimi ua inu faasoloatoa ai ma le aiga atoa, ae e tatau lava ona i ai foi se fua. E tatau lava ona i ai se taofiofiga ia aua ai ne i faataugaina ia

faamanuiaga ia e pei ona agalelei mai ai ia lo tatou Malo, i ai matou ua pulapula lagoto foi le soifuaga.

Ia o le isi au talosaga, o le isi au tuualalo, o le tulaga lea o femalagaiga. Ua i ai foi se taimi na ou faaleoina ai lea... ia ae leaga o ni tuualalo foi ma ni fautuaga mai i si o matou motu. O lea sa ou nofo ma ou faalogologo i le auSavaii ia na tutu muamua, e leai lava ma se isi na talosaga i le tulaga lea o femalagaiga i le Aso Sa. E faamalulu atu lava, ne i faapea e sili musa ia Gatoloai le manao e soli le Aso Sa le Aso Sapatu o le Atua e tatou te tapuai faatasi i ai. E faasaosao ai loto ma agaga ina ia faamamaina mai i galuega ma fita i faafitauli o le 6 aso ia ua tuanai atu. Ae o se agaga o le talosaga, ia ou te tautala lava mai lava i le taimi o vaa karasini, ou te le maua mai vaa ia sa failalaga mai ai Savaii i Upolu. Na ou maua mai taimi o vaa karasini. Mai lava i na taimi, e leai ni maketi na tatala i Aso Sa. E le i i ai ni faleoloa, tapuni mea uma, ae sa i ai lava avanoa e feoai mai ai ia Savaii aua la tulaga o galuega, tulaga o fanau aoga. Ia ae e le gata i ina, o tulaga foi lea o ni faalavelave e tutupu faafuasei, ia ae o la e maua pea se avanoa e mafai ai ona faataunuu ia fesoasoani. Ma o le ala lena o le talosaga, e na o le tuu atu lava i tafatafa o lau Afioga i le Palemia ma le Kapeneta, ia ae tainane foi ia le Komiti o lo o faapea ona fuafuaina ia tatou fuafuaga mo le Koviti, ia o le a se finagalo, o le talosaga lena mai Savaii.

Ia lau Afioga i le Fofoga Fetalai, e na o le pau lena o nai motugaafa ou te tuuina atu e fesoasoani atu ai i le tatou Tala Faatatau o le Tupe i lenei afiafi. Ia manuia tele lava lou faafeagai ai ma le faafoega o le tatou Fonotaga. Manuia le tatou Fonotaga soifua.

SUI FOFOGA FETALAI: O le ua faalanu maaveave, i le saunoaga matagofie a lau Afioga i le sui usufono mai le Faasaleleaga Nu.1.Sisifo. Malo tapena, malo foi le lauga. Ua faafofoga lou itumalo faapea foi le Maota, i talosaga ua uma ona lalafa i le Maota. Ia o lea ua faafofoga atu ia le Kapeneta, ia Afioga i Minisita ia aua foi ia le faasoaina o finagalo e pei ona i ai ia le tofa i lenei afiafi malo faafetai. Ae o le avanoa lelei foi lenei mo se isi sui usufono e fia saunoa.

Ia e pei lava ona saunoa ia le Fofoga Fetalai i le taeao ua sola, ia a mafai foi ona felafuai, ia o le agaga lena. Ne i alu loa le Nofoa, ia ma fai lana faaiuga, ia ao lo o fia faafofoga foi ia itumalo taitasi i sui usufono mamalu e pei ona avea ma o latou sui usufono. Ia saunoa ia le sui usufono o Aleipata Itupa i Luga.

Afioga AMITUANAI FAGAIVALU KENRICK SAMU (Aleipata Itupa i Luga): Ia faafetai atu i lau Afioga i le Fofoga Fetalai, faafetai foi mo le avanoa se i taumafai atu ai se sao puupuu o lenei itumalo. Sa ta faapea o taeao ta ita, ia ae e le afaina lea.

Lau Afioga i le Fofoga Fetalai, ou te manatu o lea ua pae i pule le Maota nai le Manuatele. O le Maota na maape ai tofiga o le motu sa. Aua o lele ua sausu fialele le manu nai Utufiu. Ua taumaillei ia le igoa ipu a Leuluaialii. A fetaimauso le igoa ipu a Tauiliili. Aua o lea ua o tatou pioa ma piama i le alofa le mavae o le Atua mo i tatou. E ui lava ina o tatou sese i le taimi o le ola, ia ae le mafai lava ona tuulafoaiina tatou e le Atua.

Lau Afioga i le Fofoga Fetalai e muamua lava ona ou faatulou i le Malae i Tiafau nei o le Malae o le Faautugatagi a le atunuu. E faatulou atu foi i le paia faatafafa o le Maota, i le afio o lau Afioga i le Fofoga Fetalai, aua o lau Afioga e te faatonutonu folau ia le sa o le atunuu, e ala i le Maota lenei. E faatulou atu foi i lau Afioga i le Palemia, Sui Palemia ma le mamalu o le aiga Kapeneta, tainane foi Minisita Lagolago. Faatulou atu foi i lena itu o le malu, le afifio o Taitaifono o Komiti a le Malo, ia aemaise foi le mamalu o sui usufono.

Faatulou atu foi i Ofisa Sili o Pulega o Matagaluega a le Malo aemaise foi o Faalapotopotoga i tupu ma ee, aua e le mafai lava ona faagaloina ia la outou fatuaiga tausī, aua o outou o lo o vae ma lima i ai le Malo aua lava le tau atinaeina o si o tatou atunuu, aua se manuia mo taeao. Faatulou foi i le faafofoga tapuai mai a Samoa, mai mauga tetele seia oo lava i mauga iti.

Ia ou te faatalofa atu foi i le faafogafoga mai a si ou itumalo o Aleipata Itupa i Luga, i Lalomanu, i le afio lava lea o le Tuiatua faanofonofu, lau Tofa i le Matua Fuataga, ia afifio le falefia o alii, afio Amituanai o le Maopu o le Tuiaana, ia susu o laua suafa o le tofa i le tootoo o le Igoamatua, ia ma le mamalu ia te oe le Saleaumua.

Ia o si ou nuu o Vailoa, ia le paia lava lea aua le afio o le afioga i le Sao Fetalai, afifio le Falelima o alii, ia tainane le mamalu ia Tualemoso ma Saleleaalii. Ia o si ou nuu o Ulutaotogia, ia le susu o le Sagapolutele, ia le afio o le Matua ia Falanaipupu, ia ae tausī vaatele e le mamalu ia te oe Saluafata. Ia o paia le popo lea o le itumalo, o lo o ou tiu ai aua foi ia upufai a le atunuu. Ia tapuai maia se i taumafai atu ia so tatou sao puupuu, ia aua o lo tatou itumalo, ia e le o se itumalo e tagisa tele. O lena lava ua outou silasila, i le faasoa a le Malo.

Lau Afioga i le Fofoga Fetalai e ou te fia oo lava e momoli atu le agaga faafetai tele i le Minisita o Tupe, ia o le Ofisa Sili ma le mamalu o le Matagaluega. Ua faamalo le tapena, aua foi lenei Tala o le Tupe e faauma ai foi lenei 5 tausaga, o lenei foi Paeaiga. E pau lava si vaega laitiiti e fia tatalo atu ai i lau Afioga i le Minisita o Tupe, ia se i silasila ane i penisione, a nai tagata matutua. E pei e manaia ae faaoo loa i le \$200 ia e pei e talafeuga lea. Ia ae taatia ia le faaoga o vaa ma tala fua o vai, ia aua e pei e foliga mai o le a agai lava mo i latou e mamai. Ia ao ua matutua e le mamai, ia o lea e na o le \$160. Ia ae se i silasila i ai lau Afioga, i le vaega lena ae o le auivi ato a o le Tala o le Tupe, ia e momoli atu le agaga faafetai tele. Faamalo le tau, ia

o tala lava o seleni, e faaauau ai galuega lelei ia aua le tautuaina o si o tatou atunuu.

Ia ona ou oo mai lea i le Minisita o Galuega ma Atinae tetele, ia tau lava ma lau Afioga i le faasoa, ia ae momoli atu le agaga faafetai tele i le malaevaalele i Tiavea. Ia o lea foi ua i ai le fuafuaga i lo tatou Malo, ia o le a faatele ia le malaevaalele lea. Ia e le o manu mai i le lagi, amuia lenei vaiatau o le soifua ma le ola, o ai na iluilu ma talotalo, o le a afea lea tafa o Atua e ni faamanuiaga. O lea ua foufou le malaevaalele, ia faafetai. O le a se taimi o lumanai o le a atoatoa ai ona faatino ia le atinae lea, ia ua faamalo. Faamalo lava ia le fai o le faiva.

Lau Afioga i le Minisita lava o Galuega, ia e le o toe po malae i le tagitagi atu o si ou atalii. Ia o lea lava o le a uma ia lenei Paeaiga, ia o lenei lava e tagi atu, faamolemole atu, toetiiti faatoese atu. Ia o nai auala lava ia i nai ou nuu o Lalomanu ma Vailoa ma Ulutaotogia, e talosaga atu i lau Afioga se i e alofagia nai auala ia faamolemole ma nai a matou moli auala se i alofa ae se i faaola nai o matou moli ua tele ina pepe.

Lau Afioga i le Tamaitai Minisita mo le Soifua Maloloina, faafetai tele lava, e le gata foi i lau Afioga, a o le foi sa tu i le foe i se taimi ua tuanai. Faafetai mo fomai faapitoa, ua vaaia lava ma le fiafia le autovaa ae o lea tafa o Atua mo le fomai lenei. Aua e i ai le talitonuga, sa autovaa mai lava latou i Apia nei mo fomai faapitoa, ae ua tele lava le fesoasoani mo lea itu o le matou itumalo, ua lavea uma ai lava Lotofaga, Lepa ma Aleipata Itupa i Lalo ma Luga. O lea e momoli atu ai le faafetai tele. Pau o lea, ia alofagia se fale mo le fomai, atonu o lena ua fuafua i ai le Matagaluega, ae momoli tele atu le faafetai ma le faamalo i lea foi auaunaga.

Lau Afioga i le Palemia po o le Taitaifono foi o le Komiti lea o le tatou Koviti-19, ia faamalo lava mo le tulaga ua i ai nai vaega ua tatala. Na pau lava se tuualalo a lenei itumalo, se i toe silasila lava i le va lea o tatou ma Niu Sila ina ne i te i foi ua vave tatala ae te i ua tupu mai ai se faamai, ona le aoga atoa lea o lenei taimi sa tatou faamaumau mai ai ona o le puipuiga o si o tatou atunuu mai lenei faamai. O lea e avatu ai se talosaga, manaia se i uma lelei lenei tausaga, ae aumai malie lava si vaega sia o si o tatou atunuu sa o atu e tafafao ma o i faalavelave a o la e poloka ai, e manaia lava le aumai i inei ona faataunuu pea lea o fuafuaga a le Ofisa o Falemai aua lava le saogalemu.

Ona ou oo mai lea i le Minisita lea o Leoleo ma Falepuipui, faafetai lava i lau Afioga i le Komesina, ua vaaia lava ma le fiafia le tele o le suiga ua i ai le auaunaga, tele foi o faatoaga foi ia o fualaa faasaina, ua tele ina ta vaai ua maua. Malo lava le taumafai. Ona pau lava le mea ta te fia fesili atu ai i lau Afioga i le Minisita, o tatou poloka foi nei i le po i le faaiuga o le vaiaso. Se i silasila totoa po o le a lava le tulaga foi lele o le pasene o le taumafaava se i tulou le Maota lenei, ia e ono ave ai e taofia. Aua o le mea lea e i ai, pe

3 lava fagu laiti ae fai mai lava ua ave e taofia e leoleo. Se i silasila ane po o le a le tulaga o lea vaega.

Ia ma le lona 2, se i fai atu i nai malu o le Malo, e i ai foi le mea e tau o le avafatafata, se i alolofa ane o toeaiina foi ua matutua sa tafafao i le afiafi, ae ua avatu lava ma ave sao e taofia, se i silasila totoa i ai.

Ia o le isi vaega lava o le...

SUI FOFOGA FETALAI: Malie le sui usufono mo Aleipata Itupa i Luga se i tuu atu lava le avanoa i le Minisita o le Matagaluega lea e te saunoa i ai.

Afioga Hon Tialavea Fea Leniu Tionisio Hunt: Lau Afioga i le Fofoga Fetalai, e leai ni poloka o faia i Aleipata, o i inei i le talafatai i Apia lea o lo o fai ai poloka ia e faaitiitia ai le inuava ma feoai i taavale. Masalo o le point la e i o i le Tulafono, o le Tulafono lea e faaaoga e leoleo pe 2 ea fagu ae oo i le 40. O le Tulafono la e fai mai e aua ne i ova atu i le 40 le malosi o le... pe a feula le... mo le puipuiga lava o le saogalemu o le atunuu. Ae taatia ia aua le taumafa le mea malosi ma le onana, ae o le aoga foi lena o le poloka e faaaoga ai taxi e malaga ai le au inuava i fale ma maua ai foi tupe a lena atinae o le tatou atunuu.

Tofa Olo Fiti Afoa Vaai: Lau Afioga i le Fofoga Fetalai na o se mea e fia faamalamalama.

SUI FOFOGA FETALAI: Ia saunoa le sui usufono mamalu.

Tofa Olo Fiti Afoa Vaai: Faafetai lava i le sui usufono mamalu ae masalo po o le faa-2 ai lea ona maua e leoleo le sui usufono mamalu o ona. Ou te fautuaina le Matagaluega, a toe maua, loka loa le sui usufono mamalu.

SUI FOFOGA FETALAI: Faaauau lau saunoaga le sui usufono mamalu.

Afioga AMITUANAI FAGAIVALU KENRICK SAMU: Ia, o le mea lea e tupu ai le vevesi, o le fai mai fua o le sui usufono mo Salega latou ia i si au taumafai atu. Ae ui i lea, se i uma ta o i fafo ta feiloai lelei ai.

SUI FOFOGA FETALAI: Ia, sa faapea o se mea e fia faamalamalama ae leai o le... ia saunoa.

Afioga AMITUANAI FAGAIVALU KENRICK SAMU: Lau Afioga i le Fofoga Fetalai, o lo o ou i ai lava i le vaega lea o le Minisita o Leoleo aua o ia foi lea e vaaia laisene o pisinisi. O lau faafesili faamolemole, leaga e i ai pisinisi o lea ua faatu i luga o eleele foi nei o la e i lalo o le vaaiga a le Ofisa Tausi Mavaega Se i silasila ae lau Afioga, aua o lea ua matau atu o lea

e le i vaevaea le eleele, a o lea ua tele pisinisi ia ua i luga o le eleele. Se i outou silasila totoa pe le mafai ona taofi ia pisinisi se i uma lelei ona vaevae le eleele. Ia pei o si au talosaga lea i lau Afioga i le Minisita, se i e silasila totoa ane i le vaega lea ona o le eleele o lea e i lalo o le Tausi Mavaega.

SUI FOFOGA FETALAI: Malie la le sui usufono o lea e tulai mai le Minisita se i tuu atu i ai le avanoa e saunoa ai.

Afioga Hon Tialavea Fea Leniu Tionisio Hunt: Lau Afioga i le Fofoga Fetalai, ua uma ona oo atu le Pule o le Tausi Mavaega ma matou feiloai, e leai se mea o i totonu o le matou Matagaluega e matou te iloa ai o fanua ia e faatu ai le pisinisi o fanua o la e i totonu o le esetete a tagata o lo o i le Tausi Mavaega. O lea la na avatu le lisi ia matou ia mafai ai ona matou iloa fanua ia, ona le toe faia lea o ni pisinisi i luga se i uma ona sell estate ia, a ua uma ona oo atu le Pule.

SUI FOFOGA FETALAI: Ia, se i saunoa le sui usufono. Ua a, ua manino auofala?

Afioga AMITUANAI FAGAIVALU KENRICK SAMU: Faafetai tele lava i lau Afioga i le Minisita o lenei ua tau vavala mai lava le malamalama.

SUI FOFOGA FETALAI: Ia manatua foi o le saunoaga lava a le Malo o le saunoaga manino lena e tataua ona faautagia, ioe, aua o le Malo e o e sailiili mea uma, ae o tatou ia, na ona... Ae faaauau le lauga, faaauau le saunoaga a le sui usufono mamalu.

Afioga AMITUANAI FAGAIVALU KENRICK SAMU: Ia, e le umi foi le lauga a le toeaina aua e le o se toeaina o ola i inei i Apia, o la e lava e nofo i tua, a o le tulaga foi... E sao e leai ni poloka o faia i tua i Aleipata, ae leaga e i ai lava taimi e omai ai foi tua i Apia nei, e tiga lava ona fua atu e 33, ae fai mai lava e alu a i o e taofia ai seia aulia le Aso Toonai. E pei o le ala lena o se fesili aua o lea na saunoa le Minisita, e 40%, a o lea ua ou fai atu i lau toeaina sa taofia, fai mai e feula ae e 33%. O le mea lena o lea e avatu ai le fesili, se i silasila totoa ia ma tau tuu i ai ma le mea foi lele pei se faaaloalo, leaga e matutua nai toeaina e le...

SUI FOFOGA FETALAI: Ia ua faafofoga le Minisita i le faafetai ma le aufaigaluega.

Afioga AMITUANAI FAGAIVALU KENRICK SAMU: E pei lava o le taimi o le faamai, sa logo i logo a logo faa-Tutuila fai mai o faamanuiaga e maua e le aufaisaofaga i le NPF. Ia faafeta. Sa i ai ma le lagona e lua ni nai

faamanuiaga a tatou nei o sui usufono. Ia ua ta masau atu i lena taeao, ae ota alu atu, ia ae toe faafoi mai ita fai mai e le agavaa outou. Ia o le a le faapefea ona le agavaa o tumutumuga o itumalo nei ma le fale lenei? Ae ui i lea, o le a taoto atu i lau Afioga i le Minisita ma le Pule Sili o le Faalapotopotoga.

O le isi vaega taua lava i le tulaga lea i le Minisita o Tupe, silasila totoa ane i aitalafu lea mo le aufaifaatoaga i le Development Bank, le Faletupe o Atinae. Ua ou tau matau i ai, e pei o auala lava ia mai aso ia o la e faatino ai lava le faiga o aitalafu nei, ae le o ni aitalafu tetele, po o le tai \$3,000 ae alu toetiiti masina o tau tulituli, ae le se i tau silasila lelei le Pulega po o le a foi se isi faiga e talafeauga lelei ma nei tagata mai tua, aua o aitalafu lava e fai ai le faatoaga, fai ai le pa ia, fai ai foi ma le pa moa, a o lea o le a alu lava le taimi ae le o se tupe tele, ae tataua ona silasila totoa i ai le tamaitai Pule aua ua loa tele ona tatou ai i lea faiga.

Lau Afioga i le Fofoga Fetalai, na o le pau lava lea o nai manaoga pei lava ona ou fai atu, e leai, sa ta faapea o ita taeao, ae soia ia o lea foi ua aoga ua uma atu ai foi lota taimi. A o le tatalo a lenei toeaina, lau Afioga i le Palemia ma lou auvaa, o a foi faafatiatamai, ia toa pea le tai, faamoemoe pea i le Atua, o le Atua e fesoasoani mai ia tatou. O a faaletonu, o ia lava na te faia mea lelei e tautua ai si o tatou atunuu.

Ia alofa mai le Atua ma faamanuia atu i lau Afioga i le Fofoga Fetalai, afifio foi o lenei itu o le Maota i lau Afioga i le Palemia ma le mamalu o le Aiga Kapeneta, ia i ai pea le mana lilo o le Atua e fesoasoani, o a fuafuaga o totoa o lenei foi Paeaiga po o ai le o le a toe foi mai, a o ai foi le o le a alu atu lava ma alu atu ai lava.

Ia alofagia foi le la itu o le malu i a outou Afioga i Taitaifono o Komiti eseese aemaise foi alii ma tamaitai sui usufono. Ia faamanuia foi le Atua i Ofisa Sili o Pulega o Matagaluega eseese ma Faalapotopotoga a le Malo, e le mafai lava ona faagaloina outou aua o a outou afioga i tupu ma ee o lo o fitaituga aua se manuia o si o tatou atunuu, nei, seia oo lava i le faavavau, faavavau lava. Amene. Ia manuia lenei Fono.

SUI FOFOGA FETALAI: Ua faamalo saunoa i lau Afioga i le sui usufono mamalu mai Aleipata Itupa i Luga. Ua taliga lava e fia faalogologo i mataupu taua ua e laga aua lava le agai i luma, ua faafofoga foi Afioga i Minisita e fitoitonu i ai mataupu, o se taimi o i luma ona tali aloaia lea e tusa o le fanoga o le itumalo. A ua avanoa foi lenei mo se isi sui usufono. O lo o tele lava le tatou taimi e fia saunoa aua le faafogafoga mai a itumalo taitasi aemaise le Maota.

Ia, o lea ua sauna mai le sui usufono mamalu mo Aana Alofi Nu.2.

Tofa ILI SETEFANO TAATEO TAFILI (Aana Alofi Nu.2): Faafetai i lau Afioga a le Fofoga Fetalai mo le avanoa. Ou te tulai foi ma le agaga faaaloalo i lenei itula o le aso. E manatu foi ua alu le aso o faaaaogagase ona

o le Fonotoa ma le Fonousu a Samoa. Ae manatu o le a le afaina lea, aua o le tiute ma le tatou tofi lenei na mafua ai ona tatou oo mai i le Palemene nei.

E muamua ona ou taia le tutafaitoa ma ou faatulou, tulou i le Maota o Samoa, fai mai o le Maota e teu ai le moegalafo o le auafa o upufai a Samoa, tulou. Tulou i lenei itu o le Maota i le afio o lau Afioga i le Palemia, le Sui Palemia ma le Kapeneta. E faatulou foi i lenei itu o le malu i le afifio o Taitaifono o Komiti taitasi faapea sui usufono mamalu o le Palemene o Samoa. O paia ma mamalu na o le Maota o Samoa i lenei afiafi.

E faatalofa atu foi i le afifio o Ofisa Sili o Pulega o Matagaluega o lo o faapea ona tatou faatasi ai i lenei afiafi ma le tatou Fonotaga. E le faagaloina foi le Afioga i le Failautusi o le Fono Aoaofaitulafono faapea foi le aufaigaluega i alii ma tamaitai aua le tapenaina o le Maota nei.

I le faafogafoga tapuai foi a le Faamasino Sili, o le fefaatauaigai o le tafatolu o Malo Faatemokarasi faapea le Ofisa o Faamasinoga, malo le soifua i lenei afiafi. Faafetai foi ua tofia oe ua e tulai mai i le foe e faatautaia le Ofisa o Faamasinoga. Ia faamoemoe i le Atua e faatautaia lou sa folau, ae le gata i lea, e le faagaloina le faaaloalo sa maau i ai aua lou tulai mai.

Ua matou manatu lava se i pai lava sa matou tala i le faasausauga a o le faafogafoga tapuai a Samoa i lau Afioga Mamalu O Le Ao o le Malo ma lau Masiofo, faapea foi lau Afioga i le Sui o le Fono a Sui Tofia ma lou faletua. Le paia o Samoa faafogafoga, le saofaiga a le Aiga Sa Levi o lo o faapena ona faanonomanu ma faafalelemalu i totonu o nuu ma afioaga o lo o tulivae i le ao ma le po aua se manuia o Samoa ae faapea foi tatou faiva alofilima. Malo le faitatalo malo foi le tapuai.

Ia, le usuga ia Pule ma Tumua, Itua ma Alataua, Aiga i le Tai ma le Vaa o Fonoti, e ui ina tuneva le afiafi, ae manatu o lo o faapena ona taputapu, tui le mulipapaga ma talosia mai o matou faiva aua le lipoiina o le manuia o Samoa. A o lenei itula, ia lou itumalo e Aana Alofi Nu.2, taumafai atu lo outou sui usufono e momoli se finagalo o le itumalo aua le Tala Faatatau Autu o le Tupe 2020/2021, ae le gata foi i lea o le Tala Faaopoopo Lona Tolu o le Tupe 2019/2020.

O le a le tele se faamatalaga aua e mautinoa lava e taoto lava a o se alaoo, ua manino foi ona vaega uma i le taumafaiga a lau Afioga i le Minisita ae faapea foi Matagaluega taitasi aua le galueaiina o le tatou Tala o le Tupe e pei ona taoto mai. E ui lava ina tau faasoaso aua o lenei vaitau i le aafiaga o le tamaoaiga, ae ua e taumafai lava ia faatofutofusia Matagaluega taitasi ma lau faasoaso. E le o se manao a o se mea e manaomia, o le tulaga lenei ua agai ai lau faasoaso e pei ona i ai. O lea la ua taoto mai, faafetai, o lea ua taape le fuamanusina ua taoto le Tala o le Tupe, a ua tofi le gogo ma si ana ia i le faasoaso lelei lea i Matagaluega taitasi o le seleni e pei ona faasoasoina atu.

Na pau lava le vaega e fia oo i ai se leo o le itumalo nei, e le mafai lava ona taotaomia i lalo le agaga o le faafetai ona o le siitia po o le toe faaopoopoina o le penisione a nai tagata matutua. Faafetai mo le faasoaso, e pei lava o nisi o

finagalo na avatu, ia a oo atu foi i le tausaga fou pe le atoa le \$200 ae toe tuu i ai se isi \$20, ia ua manaia ma matagofie ae fua lava i lau faasoa.

O le isi vaega e fia oo i ai se matou tautalaga, faafetai o lea ua maua le faamama avega i le Pulega o le Suavai ma le Malosiaga Faa-Eletise, aua o le manaomiaga lea o lo o manaomia uma e tagata o Samoa, e le gata i le taulaga, ae faapea foi i nuu i tua. Ae paga lea, o nisi lava o aiga ua le gafatia, ua le gafataulimaina lenei vaegaona o le lima vaivai. Peitai ane e matau atu o lea ua toe faaopoopo i ai le isi vaega aua auaunaga faapitoa nei o le suavai ma le eletise. Malo faafetai. Faafetai le lufilufilimalelei faafetai le faasoa. E lagolagoina e lenei itumalo o Aana Alofi Nu.2 le Tala Faatatau Autu o le Tupe 2020/2021, faapea foi ma le Tala Faatatau Faaopoopo Lona Tolu o le Tupe 2019/2020.

Ia o lena se lagona a o se vaivaiga o lenei itumalo e momoli atu e tusa ai o le Tala o le Tupe ua opea i le Laulau a Fono a le Palemene i lenei foi vaitau ma lenei vaiaso. A o lenei itula, o le a faasolo atu, o le tatalo faafetai ma le tatalo o manaoga, e amata atu i le Minisita mo Fesootaiga. Malo le galulue, ua matagofie le tatou Digital TV. Atonu lava e le i faasopolia nisi o Samoa atoa, a ua matagofie ua tau le maua ai ma se taimi e fai ai meaaoga a tamaiti i le mananaia o ata toe manino, ae tele ai foi ma le pili o le eletise. O lona uiga e alu i le isi vaega ae toe kava mai le isi vaega. Na pau lava le faaletonu lea e i ai, e alu alu lava i ai le taimi foi lea e pei e tau mamau ai. Se i silasila ane lau Afioga i le Minisita po o le a le mafuaaga o lea vaega. Ae avefa foi lenei avanoa e faamalo atu ai ma faafetai i le Afioga....

Tofa Olo Fiti Afoa Vaai: Lau Afioga i le Fofoga Fetalai, ou te le fia faalavelave i lou uso a...

SUI FOFOGA FETALAI: E i ai se mea ua... se i saunoa, o se mea e fia faasao po o se mea e fia...

Tofa Olo Fiti Afoa Vaai: Leai o le mea e fia faamalamalama lau Afioga. O lea e faalogologo atu faapea e alu alu lana TV tau mamau, se toaga e faagao lana TV pei o le mea lena e tau mamau ai.

SUI FOFOGA FETALAI: E le o le saunoaga lena e fitoitonu i le Minisita le sui usufono mamalu, a o lea ua e faasaoina?

Se i tulai mai le Minisita.

Afioga Hon Afamasaga Lepuiai Rico Tupai: Lau Afioga i le Fofoga Fetalai, o se mea e fia faamalamalama i le saunoaga a le sui usufono ona o lea foi la e faafofoga mai isi sui usufono mamalu ma o latou itumalo ua oo i ai le TV, ae tupu ai le mea lea pei e mamau. O le mafuaaga, e manaomia ina ia toe faatulaga le antenna i fafo, pe tuutuu i luga, pe suesue teisi lava faapea

foi lele ia maua mai le pou tonu lea e alu atu ai le faasalalauga, ou te tautino atu ia te oe, o le a manino lelei ai loa i ina. O le mamau ona e le o lelei tele le malosi o le faasalalauga lena e te maua mai. E faamaualuga teisi le antenna po o le 8 mita pe a faapea o le tulaga lena o lena e i ai. Faafetai.

SUI FOFOGA FETALAI: Tulai mai le sui usufono mamalu e saunoa.

Tofa ILI SETEFANO TAATEO TAFILI: Faafetai atu lava i le Afioga i le Minisita mo le faamalamalamaga. Masalo a toe tupu le vaega lea o lea o le a ou alu atu e faatafatafa lau antenna pe toe lelei mai ai, ae faafetai lava. E momoli atu le faafetai i le Afioga ia Faamausili Andrew Ah Liki ma i latou na faatinoina le faapipiina o le tele o pou. Matou lagona o se galuega fita ma le faigata, e tele nisi vaega i le vaofilifili, ae sa faapena ona faatino ma le lelei lenei galuega. Malo galulue, ua faapena lava ona faaleleia ona vaega uma.

Lau Afioga i le Fofoga Fetalai, o le Tulafono foi lenei e faagasolo i tua, e momoli atu lava le faamalo i le Ofisa o Faamasinoga e tauala atu i le Minisita mo Faamasinoga, ona o le tilotilo foi i ai i lenei Tulafono, o le a faapena ona sologa lelei ai ma faavavevave tulaga tau Faamasinoga, aemaise lava i le vaega lea o Faamasinoga o Fanua ma Suafa, o lo o faapena ona lipoi ai ma malupuipuia ai measina a le tatou atunuu. Na pau lava o lea, ia atonu e le o toe mamau ona faasopolia lea o le motu o Salafai, ona nofo silafia foi lea e le vaega lea pei ona o lo o tau avatu i le suiga o lo o taumafai ai nei le Faamasinoga o Fanua ma Suafa.

O le Matagaluega o Aoga, e ofo foi le agaga latou i le naunautaiga o faiaoga ma le pule aoga sa vaaia i le taimi o le lockdown, ae sa faapena ona faaauau lava galuega a faiaoga. Sa faatino lava i le faatinoga sa le solia ai le Tulafono, a o le faatinoga foi lea sa tele le tapenaga a nai faiaoga, aua foi la ua taitasi ona o atu tamaiti ma ua taitasi foi tapenaga a faiaoga i tamaiti taitasi, ae malo faafetai. Faafetai lava ua le tau aloalo ma ua le nofoai foi le pulega ma le aiga faiaoga a ua faapea lava ona faaauau le aoaoina o alo ma fanau i le taimi a o faapena ona feagai Samoa ma faamalologa o galuega ma aoga e pei ona i ai.

Na pau lava lau talosaga lau Afioga i le Minisita, se i toe tagai ane lava i le vaega lea o Aoga tau Amata, o lo o faapena lava ona taumalua nisi o aoga ona o le tulaga tau seleni e totogi ai nai faiaoga. Ia se i silasila ane i le vaega lea tautuana aua o le amataga lea o le soifua aoaoina o alo ma fanau o le Aoga Amata.

Lau Afioga i le Minisita mo le Soifua Maloloina, malo galue. I le tulai mai o lau Afioga i le Tamaitai Minisita, ua faapena ona lutia i puava i le tele o le mau faafitauli talu ona e tulai mai, ae le o taumuaalo lava lou sa ma le Matagaluega i le feagai ai o Samoa ma toatuga, malo galue. Na pau lava le matou tatalo, ia alofagia le matou falemai i Leulumoega, e manaomia lava

se matou taavale foi lea e feaveai ai tagata mamai i taimi faafuasei. Se i silasila ifo i ai i le vaega lea.

Ia ona matou oo mai lea i le Minisita o Galuega. Masalo o le isi lea Minisita e aupito fau ma soloi nisi o manaoga, a o le faafetai foi e tuu atu i lau Afioga mo galuega faatino i lea aso ma lea aso. Faamalo galue i le vaega lea a le LTA, ua toeitiiti lava oo atu i o i Malua le ta foi lea a le S-Ford lea e avatu. Ia ua matagofie, e ui lava ina saosaoa ai ma le o o taavale, ae o la e foi ua taumafai le Malo e tuu i ai ma mea foi ia o hump e tau faaitiitia ai le saosaoa o taavale, aua e moni lava o leoleo, ae le faapea o le a i ai lava leoleo i taimi uma e tulimataia le vaega lea i le saosaoa ma le o le mafaufau o taavale. Malo galue.

Faafetai o lea ua tali le toatuga a si ou pitonuu i Vaialua i Nofolii, ua leva ona feagai ma le toatuga lea i le malosiaga faa-eketise i le maualalo o le eketise. Ia o ananafi na ou ui atu ai, o lena ua faapena ona toe galulue le malosiaga faa-eketise e toe tatoso laina fou ma faapipii le transformer mo nei foi vaega o si o matou nuu o lo o faapena sa tatalo mai i le Faalapotopotoga mo se fesoasoani e pei ona i ai lea vaega. Ia ua matagofie, na pau lava o lea, ia maua lava ni nai moli se tolu po o se fa foi i pou e pei ona faapipiina ona o le pogisa tele o le vaega lea, a o lea o le a avatu le tusi talosaga i le Faalapotopotoga o le Malosi Faa-Eketise. A o tatou i ai lava i le vaega lea, e i ai le pitonuu o si ou nuu o Leulumoega Uta e le o oo i ai le laina eketise, ae masalo toeitiiti lava atoa le 20 o aiga o lo o nonofo ai i lea vaega, ua uma foi ona fai fale mautu ma fale lelei ae le i oo i ai le eketise. O lena ua taoto atu le talosaga i le Malosiaga se i tagai ifo i lea vaega, e aoga lava le eketise aemaise lava o nai fanau aoga i le faiga o latou meaaoga.

O le tulaga tau i auala galue, o lea na maua i lau faalogo le saunoaga a lau Afioga i le Minisita o faapea mai e 1 le kilomita le auala galue e faata, ae 2 kilomita o le auala e sua ma faalelei. Ia mo le silafia e lau Afioga i le Minisita, o lou auala lea na umusa i le faaiuga o le tausaga lea na tea nei, e na o le tasi lava le kilomita o le ta ae leai se 2 kilomita o le vaega lea e pei ona e saunoa i ai. Ia o le faamanatu ae e le o se faatonu lau Afioga i le Minisita.

Faafetai ua tali le galala o si ou nuu a uta o Leulumoega ma Nofolii. E ui lava ona o la ua tau amata, ia o ai na iluilu ma talotalo o lea ua taoto ata o taulelei, ia o tatou tatalo i le Atua ia umi le ola ma le malosi, ia ona faapena lea ona faataunuina lea vaega o le galuega e pei ona tatalo atu ai lo matou foi pitonuu.

Ia masalo ia pau ia lea, ioe, toe pai atu lava i lau Afioga i le Minisita o Faatoaga. O faalauiloa o fesoasoani foi lea sa ofoina atu mo le aufaifaatoaga, e le o malamalama lava i ai ia si o matou itumalo. Ou te leiloa la po o ai e amata mea i le vaega lea, po o le Matagaluega po o le pule mamalu a alii ma faipule, ia po o Sui foi o le Malo i totonu o nuu taitasi. Se i faamolemole se i tagai ane i le vaega lea, ia aua o la e nofonofo mai lava nai toeiina mai

tua, ma tuufesilisili pe i ai se galuega a le Malo i le aufaifaatoaga. Ia ae tagai ifo ai i lea vaega.

O le isi vaega sa ou oo atu i le vaega foi lea i Nuu e faafailleina ia le koko, ia o au e fai ma au masani lou alu i ai e aumai au laau e toto a ua 4 nei ia vaiaso talu ai, ou te alu atu ua matua mama lelei. Ia ua ou leiloa la ou fesili atu i ai fai mai e 3 masina faatoa toe maua se koko toto. Ia se i tagai ifo i ai ia lau Afioga i le Minisita, i lea vaega ina ia faafoia ia lea faafitauli.

Ia lau Afioga i le Minisita o Pisinisi Alamanuia ma Leipa, ia o lena foi so matou lagona. O a fuafuaga alu mamao a le Malo ma lau Afioga, se tatou vaalele e femalagaai ai ia o tatou tagata. E lelei lava le vaalele e faatautaia e Samoa, e femalagaai ai ona tagata.

Oo mai i lau Afioga i le Minisita o le Siosiomaga, ma le Punaoa Faalenatura, lau Afioga i le Sui Palemia, ia ua tele lava le aafiaga o si o matou pitonuu o Fasitoo i Vaialua, ona o le siisii o le tai ma le suiga o le tai. Se i tagai ane pe le o i ai se vaega tupe o taoto e feagai tonu ma alagatata ia mo se fesoasoani ia aua le vaega la o si ou nuu.

Ia o lena se taumafai atu, se tagivale atu a lenei foi sui usufono mai Aana ia aua le tele o galuega e fia faaleleia, ae o lena e i ina le utu a le faimea. O ia outou foi le pule ma le tatala, ia e faataunuuina ai.

Ia o lenei itula e avatu le matou faafetai tele i lau Afioga i le Taitai o le Malo ma le Kapeneta, i le faatautaiga o le sa o Samoa, i lenei foi tausaga. E ui lava ina lutia i Puava, ia o lo o faapena pea ona tatou mapu i le too, i le alofa ma le agalelei o le Atua.

Faamalo ma le faafetai i lau Afioga i le Taitaifono, faapea le Komiti mamalu o lo o faapena ona puipuia le saogalemu o Samoa, ia ao feagai ai Samoa ma le tele o faafitauli aemaise o le faamai e pei ona i ai nei. Ia o le tatalo lava ia a le sui usufono, aua le faavavevavea. E lelei lava le slow and sure, 14 aso tatou o ai i lena, aua o le upu moni lava ia, ua avea le faatofalaiga lenei a lo tatou atunuu, ua limataitaiina ai le tele o isi atunuu tuaoi ma tatou. Ioe, o le ala foi lena o le malu lelei o Samoa, mai nei faafitauli e pei ona i ai. Ia malo, malo le tofa fetalai, malo le mataala i le faatinoga o le galuega.

O le vaega lea e fia oo atu i ai sau faamatalaga, ia na ona tuu atu i lumamea. Ou te lagolagoina lava le vaega lea o le tapunia o Supamaketi i le Aso Sa ae tatala i le 3:00 itula i le afiafi. Ma o le upu moni lava ia, ia e le na ma le laina, o nisi lava aiga ua le o lolotu ae ua lolotu i le faiga o le faatau. E le gata la i le le o le aiga ae lolotu i le faiga o le faatau, ia ae ua le lolotu ai ma o tatou tagata o la e faafaigaluega e Supamaketi nei. Ia ae o le Aso Sa lava ia, o le aso e faatasitasi ai le aiga ma fai taulaga o le Atua. O lea la e lagolagoina e lou nei sui usufono le faaauau pea i le vaega lea.

Ia lou itumalo e, matau mai ua galo oe o le upu moni lava ia e le galo Afia i si ona vao. I le tapuaiga a lou itumalo, le falelua ia Nofolii ma Leulumoega, faamalo tatalo i le nofo a faafeagaiga i lo ta falelua. Aua o

outou tatalo, o lo o faapena ona maua ai le malosi o la outou auuana, e le gata i le tino ma le mafaufau, ia ae faapea foi i le agaga.

O si ou nuu o Nofolii, lau faalogologo tapuai mai, le Susu o le Alii matua o le Aiga Sa Tanuvasa, Susu foi le Aiga Sa Tanuvasa i ona matafale e fia. Tanuvasa na itulua ai Aana, Tanuvasa na atoa i ai Aana. Tanuvasa ma Aana, o oe o le laau na faufau ai Malo. Afio foi le Aiga Satuala o le Aiga Faalagilagi fai mai o le Aiga na masaesae ai le lagi, ae fai mai foi o le uluai Aiga i Samoa. Afio Taimalieutu o le fofoga o Satuala. E pola puipui le nofo ituaiga ia te oe le Faleaana. Alalatai foi le Faleaana i Gagae ma o la Tapaau ia Tauti ma Malaitai.

Lou nuu o Leulumoega, ia le Afio o Sooaemalelagi ma Alo o Tamaalelagi ma lau na faiga. Alalatai foi le fale Tuiaana o le Faleiva, ae a le alalatai o Alipia le Matuanatogi o le faalanumaaveave, o oe o le Tumua na tofofi e te tausiga vaatele aua le paia i Aiga e Fa, ma laau na faufau. Faafetai mo la outou tapuaiga, ua le lilia ai le tou sui usufono pe a tu i le mauga, aua o lo o faapena ona outou tui le mulipapaga, ma feula mulila. Aua tou te manatu mama i le tausiga i le tootoo o tumua. Aua o lea e tumatie lava le tootoo o Tumua, o le tootoo e le soona lagavale, e le siosio soo seivagana ua potopoto ia Samoa.

Ia o lea se matou faamatalaga lau Afio i le Fofoga Fetalai, ia manuia ia le Fonousu ma le Fonotoa a Samoa, faafetai.

SUI FOFOGA FETALAI: Faafetai, ua faamalo le fetalai oe le Tumua, ia ae o le sui usufono mamalu foi o se tasi lea o sui usufono o le Komiti o Tupe o le Palemene. O lea ua faafofoga lou itumalo, o lea lava e momoli lava finagalo o le itumalo, ia se taimi o i luma, ona fai foi lea o le faasoa a le Kapeneta i le mea e mafai. O lea e momoli atu ai le faamalo ma le faafetai, malo sauni, malo foi le tapena.

O lo o lava lava ia le tatou taimi, ia mo se isi sui usufono e fia saunoa. O le... ia o lea ua tulai mai ia le sui usufono o Gagaemauga.

Tofa LENATAI VICTOR FAAFOI TAMAPUA (Vaimauga i Sisifo Nu.1): O Vaimauga i Sisifo Nu.1.

SUI FOFOGA FETALAI: Ia faasao atu le sui usufono o Vaimauga i Sisifo Nu.1.

Tofa LENATAI VICTOR FAAFOI TAMAPUA (Vaimauga i Sisifo Nu.1): Ia e saga viia pea le alofa ma le agalelei o le tatou Tama i le lagi, mai lava i le taeao analeila seia oo mai i lenei itula, i le tuneva o le po, ia o lo o tatou molimauina pea, lana le tuulafoai ia te i tatou, ia aemaise o lona alofa e le uma.

Lau Afio i le Fofoga Fetalai, ou te faatalofa atu i le paia maualuga, ma le mamalu tele o lenei Maota, lea afio i le Afio i le Taitai o le Malo le

Afioga i le Palemia, Sui Palemia ma le nofo a Minisita, Kapeneta. Afio o lau Afioga i le Fofoga Fetalai, ia ma sui usufono mamalu uma o le Palemene o Samoa. Susu foi lau Susuga i le Failautusi, ia ma le Ofisa o le Fono Aoa, le afifio o Ofisa Sili o Pulega ma Ofisa Sinia o Matagaluega ma Faalapotopotoga a lo tatou Malo, malo lava le soifua maua, le soifua laulelei i lenei itula o le po.

Ou te faafetaia lau Afioga i le Fofoga Fetalai, o lenei avanoa maualuga, ia ua faapeana ona maua e lenei sui usufono, e avatu ai foi se sao o lo matou nei itumalo.

Ia e muamua ona ou faatulou i le tapuaiga paia a lou itumalo pele, Vaimauga i Sisifo Nu.1, i le Afio o le Afioga i le Matua ia Tofaeono, Afio Asi ma Patu, Afio o Aiga e tolu, Afio le Leusoalii, Alalatai laua na tai Tamapua ma Manogiamanu, ma le mamalu o le nofo a ituaiga ia Fuata, ia tainane le mamalu ia Taga ma Sataga. O Paia faataotooto na o Vaimauga i Sisifo Nu.1. aua le Paia maualuga i Susuga a Faafeagaiga ma le aufaigaluega a le Atua, i le nofo a fataloa o le Talalelei, ia o le Paia ma le mamalu o tupu ma ee, failauga ma ponaoo, saoa ma aualuma, o faletua ma tausī, aumaga ma ava aumaga, e oo lava i tupulaga talavou. Faafetai tatalo, faafetai tapuai.

Lau Afioga i le Fofoga Fetalai, momoli atu le faamalo ma le faafetai tele, i le Afioga i le Minisita, Minisita Lagolago, le Alii Pule ma le Matagaluega o Tupe, o lea ua saa faaoti le utu a le faimea, tapenaina o lenei galuega maeaea. Faamalo le galulue.

Lau Afioga i le Fofoga Fetalai, e matua malamalama, e matua lagolagoina e lou nei sui usufono le Tala Faatatau o le Tupe, Tala Autu o le Tupe 2020/2021. Ia e faapena foi ona lagolagoina foi le Tala Faatatau Faaopoopo Nu.3 2019/2020. Ma o le a leai foi se faamatalaga e faia i vaega ia. Ae e fia tulituli matagau pea le ufi a le tamaitai, e tusa ai ma manaoga o tulaga e fia faalelei o le itumalo.

Lau Afioga i le Minisita o Tupe, e momoli atu le agaga faafetai mai le toatele o aiga i totonu o lenei itumalo aemaise foi o Faalapotopotoga ia ma pisinisi, o lea e faamanuiaina i lalo o le Vaisigano catchment project. Faamalo faafetai, faafetai ai foi i lau Afioga i le talia o le tatalo atu i se vaegatupe i lalo o le Green Climate Fund, ina ia faaleleia ai le auala, ia ma fai faalelei alavai, ia i si o matou nuu lea i Vaipuna. Malo faafetai ae tatalo atu ma le agaga maualalo, ia o lo o manaomia lava ia le laveai, i le itu Sasae o le Apia Park, ia e fai lava sina maualalo o le vaega lea, ia i timuga tetele pe itiiti, ia e lolovaia atoa ia lea vaega, ma faigata ai ia feoaiga, ia o nisi o matou aiga e faapena ona afifio ma papaaao i lea vaega o le matou nuu.

Ia o lo o i ai foi ia faafitauli o lo o aliae mai i lea vaega, atonu e fesoasoani mai foi ia le Minisita o Galuega Tetele ia aemaise foi le Minisita o le Siosiomaga ma Punaoa Faalenatura. O le vai lea e faapea e toa i le Apia Park, ia ae o lea ua faaoga atu nei ia paipa e drain atu ai le vai lea, e agai tonu lava i le mea lea o lo o i ai ia le togatogo. Ia o lo o nofoia ai foi ma nisi

o aiga ia lea vaega, ia ua i ai le manatu, ua ono lepeti ai foi ia le soifua maloloina. E le gata i tagata o lo o nonofo ai, ia aemaise ia ia ma figota o lo o faapena ona nonofo i totonu o le vai i le vaega lea o le togatogo. O lea e tatalo atu ai, e manaomia vave ia se fesoasoani. O le vaiaso na tea lea sa asiasi atu ai nisi o le Ofisa o le Siosiomaga, ia o lo o talia ia po o le a se faamatalaga mai i le latou lipoti, ma le faaaloaloa lava.

Ia, e oo atu se faamatalaga i lau Afioga i le Minisita mo Faatoaga ma Faigafaiva, e momoli atu le agaga faafetai i galuega e tele ua faapena ona faatino mo le tatou atunuu, aemaise foi o le tali mai i nisi foi o talosaga a si o matou itumalo. Faafetai foi i nai iliafi ia e 2 lea ua maua mo si o matou nuu lea i Moataa i lalo o le polokalame lea o manu aini. Faamalo faafetai. Ae tatalo atu foi i lau Afioga ma faafetaia ai foi le faamatuu atu foi o le vaega o Faigafaiva e fai le latou asiasiga i le togatogo lea i Moataa, lea sa avatu ai foi le talosaga ma fai le latou sailiga, o lo o tele le avanoa e ono fai ai se faasao paa, aemaise foi se pa tilapia e mafai ai ona tua i ai si o matou nuu. O lea e tatalo atu ai i lau Afioga, ia faapena ona alofa maia, o lea o le a maea le tatou Paeaiga, ae o le talosaga lea pei ona tuuina atu i nai tausaga ua tuanai atu.

Lau Afioga i le Minisita mo Galuega Tetele, e talitonu o lena ua e tauaaoina nisi o talosaga aemaise o nai talosaga ia a si o matou nuu i Vaivase uta i le auala lea o le Settlement Road ia faapea foi ma le Upper Lieu Road o lo o i ai i le taimi lenei, e tele lava le faaletonu, e manaomia lava se fesoasoani ina ia faafaigofie ai feoaiga aemaise o taimi o faalavelave faafuasei. Aemaise foi le auala lea i Vaivase tai, le auala lea sa totope ai le galuega ona o taaloga a le Pasefika, ia ua oo mai i le taimi lenei ua i ai foi se faaletonu i le auala lea i Vaivase tai i luma tonu o le maota o le Tiakono o le Ekalesia Katoliko i Vaivase tai faamolemole, pe mafai ona tagai i ai le tatou Ofisa.

E fia oo atu foi se leo pei ona faaalua mai e si ou uso a sui usufono mai Vaimauga Sasae i le vaega lea o le tulaga o taligalu aua o lea sa tau ai Moataa, na o se vala laititi lava e fia faasao ne i faaseseina ai le Afioga i le Minisita ona o lo o i ai le matou talosaga e fia fai le matou taligalu. E pei ona saunoa le sui usufono, o lo o i ai le taligalu ae maualalo. O le taimi lenei, e leai se taligalu o i ai, e le o i ai se taligalu i Moataa. O lo o manaomia se taligalu. A sua tutui le tai, ua oo mai i luga o le aualatele, ae mo le silafia, o le aualatele lea o lo o faaogaina uma e o tatou tagata o lo o faapena ona afifio ma papaa o le itu i sasae o le tatou atunuu. O lea e tatalo atu ai, o le main road, e manaomia se taligalu i Moataa. Ia, pei ona silafia e fai le taligalu i Vaiala fai le taligalu i Fagalii se i tulou, o lo o faapena ona sua mai loa le tai e pei ua mimiti uma mai ia Moataa ma suatetele ai foi le togatogo ua afaina ai foi tuafale ma lumafale o aiga o lo o faapena ona nofoia lea vaega. O lea e tatalo atu ai mo se fesoasoani foi i lau Afioga i le Minisita mo Galuega Tetele mo lea vaega.

Ae momoli atu le faafetai i lau Afioga i le Palemia, le Sui Palemia aemaise le nofo a Minisita mo galuega e tele mo lenei Paeaiga, malo lava le faafoe malo le finau, malo lava le galulue.

Lau Afioga i le Fofoga Fetalai, ae le i maea sau faamatalaga, e fia faaoga foi lenei avanoa e faatalofa ma faamalo ai i se tasi o tama fanau a lenei itumalo, tama o le Fuaiupolu. E moni ai le saunoaga a se tasi o tama matua o le matou itumalo, o lea ua malolo manumalo se tasi o tatou toa iloga i le Tulafono, ae o lea ua toe tulai mai le isi toa a le tatou Fuaiupolu. I lau afioga i le Faamasino Sili lau Afioga Satiu Simativa Perese, malo le finau, malo le faaea i tatou aiga, nuu ma Ekalesia. Alo ia manuia ou faiva.

Lau Afioga i le Fofoga Fetalai, faafetai mo le avanoa. O le tatalo, ia maua sou finagalo aua le taitaiga o le tatou Fonousu, le Afioga i le Taitai ma le nofo a Minisita, ia i ai foi le agalelei o le Atua. Ia manuia taualumaga o totoe. Faafetai.

SUI FOFOGA FETALAI: Malo faafetai, o lea ua faafofoga le fale Vaimauga i lau saunoaga, o lea foi ua faafofoga le Malo, ia taoto laia le faasoa aua le agai i luma ma le manuia o le itumalo. Ua manatu o lea ua tatou taunuu tonu lava i le faaiuga o galuega o lenei afiafi, le taimi atofaina e tusa ai o le lafo na faatu e le Palemia. Ona i ai lea o le manatu, ia avea ia lou leo faatauvaa i lenei itula afiafi e momoli ai le faamalo ma le faafetai i le paia maualuga o le Maota i ona tulaga faalupe ma ona tulaga e faalagilagi ai. Malo saunoa, malo tapena, ua faafofoga le atunuu o lea lava e faatino lo outou tiute na valaauina ai e le Atua aua lava le atinae manuia o le atunuu i so o se vala. Ia maua la outou lauga, maua le tofa ma le moe aua le Malo ma lona tauatinaeina.

E ia te au foi le agaga faaaloalo e momoli ai le faamalo ma le faafetai i lau Afioga i le Palemia, le Sui Palemia ma le Kapeneta, Minisita Lagolago i lena itu e faapea foi Taitaifono o Komiti aloaia a le Palemene. Malo le onosai, malo le tofa, malo foi mo finagalo faaalua i lenei aso. O lea lava ua tetele a i pesega ae ua matua a i le oo, ua manuia faiva o lenei aso. E momoli atu ai le faafetai tele i la outou lagolago mai foi i le galuega a le Nofoa, e le faigofie, a o le galuega e galulue faatasi ai sui usufono mamalu uma o le Palemene ona taunuu lea i le manuia le gasologa o fonotaga ma le Fonousu a Samoa.

Ae le i faaiuina le tatou galuega, ou te faaiuina i se tatalo.

Na tolopo Taualumaga a le Fono Aoaofaitulafono i le itula e 11:00 i le po seia aulia le itula e 9:00 i le taeao o le Aso Tofi, 18 o Iuni 2020.